



ЖИСМОНИЙ ВА МАЪНАВИЙ ЕТУК ЁШЛАР — ЭЗГУ МАҚСАДЛАРИМИЗГА ЕТИШДА ТАЯНЧИМИЗ ВА СУЯНЧИМИЗДИР

Президент Шавкат Мирзиёевнинг
“Камолот” ёшлар ижтимоий
ҳаракатининг IV қурултойидаги нутқи

Қадрли анжуман иштирокчилари!
Аввало, сиз, азизлар билан “Камолот” ёшлар ижтимоий ҳаракатининг IV қурултойида учрашиб турганимдан хурсанд эканимни билдириб, барчангизга ўзимнинг чуқур ҳурматим ва эзгу тилакларимни изҳор этишга рухсат бергайсиз.

Очигини айтганда, мен бугунги учрашувга кўпдан буён тайёргарлик кўриб келаётган эдим. Юртимиз ёшларининг муносиб вакиллари, эртанги кунимиз эгалари бўлган сиз, азиз ўғил-қизларимиз даврасида ёшимиз, лавозимдаги фарқларга эътибор бермасдан, худдики сизлар билан тенг бўлиб, чин дилдан, самимий бир суҳбат қуришни анчадан бери орзу қилиб келар эдим.

Бугун сизларнинг қалбингиз, юрагингиздаги ўй-фикрлар, мақсад-муддаолар, керак бўлса, ушалмай турган ниятлар билан яқиндан танишиш, шу асосда ёшлар сиёсати бўйича олиб бораётган ишларимизни танқидий баҳолаб, тегишли қарорлар қабул қилишни мен ўз фаолиятим учун гоят муҳим деб ҳисоблайман.

Маълумки, ёш авлод тарбияси ҳамма замонларда ҳам муҳим ва долзарб аҳамиятга эга бўлиб келган. Аммо биз яшаётган XXI асрда бу масала ҳақиқатан ҳам ҳаёт-мамот масаласига айланиб бормоқда.

“Тарбия қанча мукаммал бўлса, халқ шунча бахтли яшайди”, дейди донишмандлар. Тарбия мукаммал бўлиши учун эса бу масалада бўшлиқ пайдо бўлишига мутлақо йўл қўйиб бўлмайди.

Барчангизга аён, ҳозирги кунда дунё миқёсида бешафқат рақобат, қарама-қаршилиқ ва зиддиятлар тобора кескин тус олмақда.

Диний экстремизм, терроризм, гиёҳвандлик, одам савдоси, ноқонуний миграция, “оммавий маданият” каби хавф-хатарлар кучайиб, одамзот асрлар давомида амал қилиб келган эътиқодлар, оилавий қадриятларга путур етказмоқда.

Мана шундай ва бошқа кўплаб таҳдидлар инсоният ҳаётида жиддий муаммоларни келтириб чиқараётгани — аини ҳақиқат ва буни ҳеч ким инкор этолмайди.

(Давоми 2-, 3-, 4-, 5-бетларда.)

Ўзбекистон Республикаси Президентининг Фармони

РЕСПУБЛИКАДА АХБОРОТ ТЕХНОЛОГИЯЛАРИ СОҲАСИНИ РИВОЖЛАНТИРИШ УЧУН ШАРТ-ШАРОИТЛАРНИ ТУБДАН ЯХШИЛАШ ЧОРА-ТАДБИРЛАРИ ТЎҒРИСИДА

Кейинги йилларда ахборот-коммуникация технологияларини (кейинги ўринларда АКТ деб аталади) давлат бошқаруви ва давлат хизматлари кўрсатишнинг барча соҳаларига жорий этиш бўйича босқичма-босқич ўтказилаётган ислохотлар ахборот хизматларини илгари суриш, «электрон ҳукумат» тизимини ривожлантириш ва амалга ошириш, халқ билан мулоқот қилиш ва аҳолининг кундалик муаммоларини жойларда ўз вақтида ҳал қилишнинг самарали механизмларини яратиш имконини берди.

Бу борада эришилган натижаларга қарамасдан, ахборот технологиялари ривожланиши ва уларни иқтисодиёт соҳаларига жорий этишнинг ҳозирги ҳолати, шунингдек маҳаллий дастурий маҳсулотларнинг экспорт даражаси ҳали ҳам пастлигича қолмоқда. Ахборот технологияларининг рақобатдош ва юқори унумдорликка эга тармоғини шакллантириш учун мамлакатнинг фан ва таълим соҳасидаги салоҳиятидан етарлича фойдаланилмапти.

(Давоми 7-бетда.)

Ўзбекистон Республикаси Президентининг Қарори

ЎЗБЕКИСТОН РЕСПУБЛИКАСИ ФАНЛАР АКАДЕМИЯСИ ҲУЗУРИДА ЎЗБЕКИСТОННИНГ ЭНГ ЯНГИ ТАРИХИ БЎЙИЧА ЖАМОАТЧИЛИК КЕНГАШИ ФАОЛИЯТИНИ ТАШКИЛ ЭТИШ ТЎҒРИСИДА

Ўзбекистон миллий давлатчилигининг вужудга келиши ва тараққий топишининг энг янги тарихини тадқиқ этиш ва ўқитиш, илмий, илмий-оммабоп, ўқув-методик, маърифий адабиётларни тайёрлаш ва чоп этиш, илм-фаннинг таълим ва бошқа ижтимоий соҳалар билан интеграцияси механизмларини мустаҳкамлаш ва ривожлантириш борасида илмий, маданий, таълим, жамоат муассасалари ва ташкилотлари фаолиятини мувофиқлаштириш ишларининг самарадорлигини ошириш, ёшларда, авваламбор, умумтаълим мактаблари, касб-хунар коллежлари, академик лицейлар ўқувчиларида, олий таълим муассасалари талабаларида мамлакат тарихи ҳақидаги чуқур билимларни шакллантириш мақсадида:

1. Ўзбекистон Республикаси Президентининг 2017 йил 17 февралдаги «Фанлар академияси фаолияти, илмий-тадқиқот ишларини ташкил этиш, бошқариш ва молиялаштириши янада такомиллаштириш чора-тадбирлари тўғрисида»ги ПҚ-2789-сонли қарорига мувофиқ, Олий ва ўрта махсус таълим вазирлиги ҳузуридаги Ўзбекистоннинг энг янги тарихи бўйича Жамоатчилик кенгаши Ўзбекистон Республикаси Фанлар академияси ҳузуридаги Ўзбекистоннинг энг янги тарихи бўйича Жамоатчилик кенгашига (кейинги ўринларда — Жамоатчилик кенгаши) айлантирилганлиги маълумот учун қабул қилинсин.

(Давоми 9-бетда.)

Yoshlarga oid davlat siyosati – amalda

Ўзбекистон ёшларининг янги ташкилоти



Тошкентдаги Симпозиумлар саройида 30 июнь куни Ўзбекистон “Камолот” ёшлар ижтимоий ҳаракатининг IV қурултойи бўлиб ўтди.

(Давоми 6-бетда.)

Гурур ва ифтихоримиз тимсоли

Ўзбекистон Республикаси
Давлат герби қабул
қилинганига 25 йил тўлди



Ўзбекистон ёшларининг янги ташкилоти

(Давоми. Боши 1-бетда.)

Анжуман дастури ранг-баранг тадбирларга бой бўлди. Курултой делегатлари Ўзбек Миллий академик драма театрида "Тақдир синовлари" спектаклини томоша қилди. "Шахидлар хотираси" хиёбони ва "Қатагон қурбонлари хотираси" музейи, Темурийлар тарихи давлат музейи, Хазрати Имом мажмуасини бориб кўрди. Ўзбекистон давлат жаҳон тиллари университети, Тошкент ахборот технологиялари касб-хунар коллежи,

Яккасарой туманидаги 144-умумтаълим мактабида яратилган шароитлар билан танишди. Ёшлар ижод саройида Олий Мажлис Қонунчилик палатаси депутатлари, Ўзбекистон Республикаси Фанлар академиясида академиклар ва ёш олимлар билан учрашди.

Курултой делегатлари Мустақиллик майдонида ҳурриятимиз, порлоқ истиқболимиз ва эзгу ниятларимиз рамзи бўлган Мустақиллик ва эзгулик монументи пойига гуллар кўйди.

Симпозиумлар саройида "Камо-

лот"нинг Қорақалпоғистон Республикаси, вилоятлар ва Тошкент шаҳар кенгашларидан сайланган делегатлар жам бўлди. Курултой кун тартибига кўйилган масалаларнинг долзарблигидан келиб чиқиб, унда қатнашиш учун Олий Мажлис Сенати аъзолари ва Қонунчилик палатаси депутатлари, ҳукумат аъзолари, вазирлик ва идоралар, жамоат ташкилотлари вакиллари, оммавий ахборот воситалари ходимлари таклиф этилди. Шунингдек, видеоконференция орқали Қорақалпоғистон Республикаси раҳба-

рия, маҳаллий ҳокимликлар раҳбарлари, худудлардаги ёшлар қатнашди.

"Камолот" ёшлар ижтимоий ҳаракатининг курултоийи очик, деб эълон қилинди.

Ўзбекистон Республикаси Давлат мадҳияси янгради.

Курултойда Ўзбекистон Республикаси Президенти Шавкат Мирзиёев нутқ сўзлади.

Делегатлар "Камолот" ёшлар ижтимоий ҳаракати негизида Ўзбекистон ёшлар ittifoqini ташкил этиш таклифини маъқуллади.

"Камолот" ёшлар ижтимоий ҳаракати Тошкент шаҳар кенгаши раиси ўринбосари Б.Мамадалиев, "Камолот" ёшлар ижтимоий ҳаракати Қорақалпоғистон Республикаси кенгаши раиси А.Данияров, Тошкент шаҳридаги Турин политехника университети магистранти О.Тўйчиев, "Result" ўқув маркази раҳбари А.Саъдуллаев, Алишер Навоий номидаги Тошкент давлат ўзбек тили ва адабиёти университети талабаси М.Раимкулова, Сирдарё вилоятидаги "Сарвиноз Собиржоновна Файзи" фермер хўжалиги раҳбари С.Шокирова ва бошқалар Президентимиз Шавкат Мирзиёевга ёшларга қаратилаётган алоҳида эътибор учун миннатдорлик билдирди. Ўзбекистон ёшлар ittifoqi навқирон авлод орасига чуқур кириб борадиган муҳим институтга айланишини таъкидлади.

Ўзбекистон ёшлар ittifoqi марказий кенгаши раиси этиб Қахрамон Қуронбоев сайланди.

ЎзА.



Жиноятчилик ва ҳуқуқбузарликлар камаймоқда

Сирдарё вилояти Сирдарё туманида ўтказилаётган профилактика тадбирлари жиноятчилик ва ҳуқуқбузарликларнинг олдини олишда муҳим аҳамият касб этмоқда.

Ўзбекистон Республикаси Олий Мажлиси Қонунчилик палатаси, халқ депутатлари вилоят, туман Кенгашлари депутатлари, туман ҳокимлиги, прокуратура вакиллари, профилактика инспекторлари, маҳалла фаоллари, нуронийлар ва ёшлар иштирок этган тадбирларда Президентимиз Шавкат Мирзиёев ташаббуси билан ҳар пайшанба кuni ўтказилаётган профилактика тадбирлари ҳудудда жиноятчилик ва ҳуқуқбузарликларнинг олдини олиш, жойларда маънавий муҳит барқарорлигини янада мустаҳкамлашда юксак самаралар бераётгани тасдиқланди. Аҳоли ўртасида ўтказилаётган тарғибот-тушунтириш тадбирларида жиноятни келтириб чиқараётган сабаб ва омиллар, уларнинг оқибатлари атрофлича муҳокама қилинмоқда.

Жорий йил февраль ойидан буён тумандаги 6 минг 480 хонадоннинг турмуш шароити ўрганилиб, мавжуд муаммоларни жойида ҳал этиш чоралари кўрилди. Ички ишлар бўлимида профилактик ҳисобда турувчи, илгари судланган 155 ва оиласида мунтазам муаммолар бўладиган 28 фуқаро билан яқна тартибда суҳбат ўтказилди. Тезкор-қидирув тадбирлари натижасида 1 нафар бедарак йўқолган шахс

аниқланиб, яшаш манзилига қайтарилди. Паспорт-виза, доимий ёки вақтинча яшаш қоидалари бузилган 415 ҳолат бўйича тегишли тартибда чора кўрилди. Жиноят содир этиб, суд ва тергов органларидан яшириниб юрган қидирувдаги ҳамда экстремистик оқимларга мойил бўлган шахсларнинг оила аъзолари билан профилактик суҳ-



Payshanba — profilaktika kuni

батлар ўтказилиб, жиноят учун жазо муқаррарлиги тушунтирилди. — Барча мутасадди ташкилотлар билан ҳамкорликда ўтказилаётган профилактика тадбирлари ўз самарасини бермоқда, — дейди Сирдарё тумани ички ишлар бўлими бошлигининг биринчи ўринбосари, майор С.Йўлдошев. — Ўтган йилнинг шу даврида туманда турли даражадаги 298 жиноят, вояга етмаганлар ўртасида 82 ҳуқуқбузарлик ва майда безорилик ҳолати қайд этилган бўлса, жорий йилда бу кўрсаткични кескин камайтиришга эришилди. Ҳозир вояга етмаганларнинг 78 нафари профилактик ҳисобда туради, улар ҳудудлардаги 28 профилактика инспекторининг доимий назоратига олинган.

Туман ички ишлар бўлими, прокуратура, имом-хатиблар, "Маҳалла" хайрия жамоат фонди, "Нуроний" жамғармаси туман бўлимлари, "Камолот" ёшлар ижтимоий ҳаракати туман кенгаши ва бошқа жамоат ташкилотлари вакиллари билан ҳамкорликда жиноятчиликка қарши курашиш ва ҳуқуқбузарликларнинг олдини олишга қаратилган учрашувлар мунтазам ўтказилмоқда.

Вилоят ҳуқуқ-тартибот органлари ходимлари томонидан ўтказилган "Қорадори – 2017" тадбири да-

вомида туманнинг Баҳор маҳалласидаги Дўстлик кўчаси, 111-уйда яшовчи фуқаро, муқаддам судланган Б.Содиқов ҳовлисида қонунга хилоф равишда 11 туп кўкнори ва 3 туп наша ўсимлиги эккани аниқланиб, «захри қотил» шу ёрнинг ўзида йўқ қилинди. Мазкур ҳолат юзасидан Жиноят кодексининг тегишли моддасига биноан Б.Содиқовга нисбатан жиноий иш қўзғатилган.

Ўтказилаётган тадбирларда, катта-кичиклигидан қатъи назар, ҳар қандай жиноятнинг келиб чиқиш сабаб ва омиллари кенг жамоатчилик ўртасида ҳуқуқбузарлар, уларнинг қариндош-уруғлари, маҳалладошлари иштирокида муҳокама қилинаётгани яхши самара бермоқда. Жумладан, Дўстлик маҳал-

ласида яшовчи Р.Затесов содир этган фирибгарлик жинояти унинг яқинлари ва маҳалладошлари иштирокида муҳокама қилинди. Унга нисбатан Жиноят кодексининг тегишли моддасига асосан жиноят иши қўзғатилди.

Интилиш маҳалласида яшовчи М.Эргашбоев маҳалладоши Ж.Казакбаевнинг уйига ўғирликка тушиб, 600 минг сўмлик "Лэо" русумли сув насосини ўғирлаган. Туман ички ишлар ходимлари томонидан ўтказилган тезкор профилактик тадбир давомида жиноят аниқланиб, бу масала маҳаллада атрофлича муҳокама қилинди. Аниқ далиллар асосида М.Эргашбоевга нисбатан жиноят иши қўзғатилди.

Профилактика кунида тумандаги "Баҳор", "Ёшлик", "Адолат" ва "Пахтакор" маҳалла фуқаролар йиғинларида мутасадди ташкилотлар вакиллари иштирокида аҳоли билан очик мулоқотлар ўтказилди. Фуқаролар мурожаатларини ҳеч қандай тўсиқларсиз кўриб чиқиш, мавжуд муаммо ва ижтимоий-ҳуқуқий масалаларда аҳолига яқиндан ёрдам кўрсатиш мақсадида сайёр қабуллар ташкил этилди. Ҳудудда содир этилган жиноят ва ҳуқуқбузарликлар, аниқланган ноқонуний ҳаракатлар кенг жамоатчилик иштирокида муҳокама қилинди.

А.ҚАЮМОВ,
ЎзА мухбири

Ўзбекистон Республикаси Президентининг Фармони

РЕСПУБЛИКАДА АХБОРОТ ТЕХНОЛОГИЯЛАРИ СОҲАСИНИ РИВОЖЛАНТИРИШ УЧУН ШАРТ-ШАРОИТЛАРНИ ТУБДАН ЯХШИЛАШ ЧОРА-ТАДБИРЛАРИ ТЎҒРИСИДА

(Давоми. Боши 1-бетда.)

Республикада амал қилаётган ташкилий-иқтисодий шароит АКТ соҳасида тез ўсишни намойиш этаётган хорижий мамлакатларда яратилган шароитларга нисбатан мамлакатнинг рақобатдошлиги пастлигини ҳисобга олган ҳолда ушбу соҳанинг янада ривожланишига етарли даражада ёрдам берилади.

АКТнинг жадал ривожланиши янги имкониятларни очиб берар экан, давлат томонидан кенг қўлланма қўллаб-қувватлашни ҳамда республиканинг халқаро АКТ бозоридagi ўрнини кучайтиришни талаб қилади.

АКТдан фойдаланишга асосланган иқтисодиётнинг юқори технологик тармоқларини шакллантириш ва фаол ривожлантириш учун қўлай шароитлар яратиш, ахборот технологиялари маҳсулотлари ишлаб чиқарувчилар ва буюртмачиларига қўшимча имтиёзлар ва преференциялар бериш ҳисобига ушбу тармоқда илм-фан, таълим ва ишлаб чиқаришнинг интеграциялашуви янада чуқурлаштириш, АКТ маҳсулотлари экспортини кўпайтириш, шунингдек маҳаллий ва хорижий инвестициялар жалб этилишини рағбатлантириш мақсадида:

1. Ўзбекистон Республикаси Ахборот технологиялари ва коммуникацияларини ривожлантириш вазирлиги, Тошкент шаҳридаги Инха университети ва «Ўзбектелеком» АКнинг Ахборот технологияларини ишлаб чиқиш ва жорий қилишни қўллаб-қувватлаш бўйича «Mirzo Ulugbek Innovation Center» инновация марказини (кейинги ўринларда Инновация маркази деб аталади) ташкил этиш тўғрисидаги таклифи қабул қилинсин.

2. Белгилаб қўйилсинки, Инновация маркази ахборот технологиялари маҳсулотларини ишлаб чиқаришни ривожлантириш учун энг қўлай шароитларни яратиш мақсадида бутун республика ҳудудида Инновация маркази резидентларини жойлаштирган ҳолда Ўзбекистон Республикаси ҳудуди доирасида экстерриториаллик принципи асосида ташкил қилинади.

3. Қуйидагилар Инновация маркази фаолиятининг асосий йўналишлари этиб белгилансин:

хўжалик юритувчи субъектлар ва олий таълим муассасаларининг ахборот технологиялари маҳсулотларини ишлаб чиқариш ҳамда ички ва ташқи бозорларда сотишга қаратилган ўзаро ҳамкорлигини кенгайтириш учун зарур ташкилий-техник ва молиявий-иқтисодий шарт-шароитлар яратиш;

АКТ соҳасида рақобатдош лойиҳаларни ички ва ташқи бозорларда сотиш учун хорижий инвестицияларни жалб этишда Инновация маркази резидентларига қўмаклашиш; олий таълим муассасалари ва касб-хунар коллежларининг «ахборот технологиялари» мутахассислиги бўйича битирувчиларининг ишга жойлаштирилишини таъминлашда, шу жумладан иқтидорли ёшлар томонидан «старт-ап» лойиҳаларини амалга оширишда уларни қўллаб-қувватлаш йўли билан иштирок этиш;

қисқа муддатли ва ўрта муддатли ихтисослаштирилган курсларни ташкил этиш, шу жумладан чет эл мутахассисларини таклиф этиш йўли билан АКТ соҳасидаги кадрлар малакасини ошириш ва уларни қайта тайёрлашни ташкил қилиш;

ёш тадбиркорлар томонидан ахборот технологиялари маҳсулотларини ишлаб чиқариш соҳасидаги истиқболли йўналишлар бўйича инновация лойиҳалари амалга оширилишини қўллаб-қувватлаш.

4. Ахборот технологияларини ишлаб чиқиш ва жорий қилишни қўллаб-қувватлаш бўйича «Mirzo Ulugbek Innovation Center» инновация марказининг Мувофиқлаштирувчи кенгаши (кейинги ўринларда Мувофиқлаштирувчи кенгаш деб аталади) иловага мувофиқ таркибда ташкил этилсин.

Қуйидагилар Мувофиқлаштирувчи кенгашнинг асосий функциялари этиб белгилансин:

Инновация марказини ривожлантиришга қўмаклашиш борасида давлат органлари, илмий, таълим муассасалари ва бошқа ташкилотлар фаолиятини мувофиқлаштириш;

республикада ахборот технологиялари соҳасини ривожлантиришда Инновация маркази фаолиятини тизимли мониторинг қилиш ва таҳлил қилиш;

Инновация марказининг фаолиятини такомиллаштириш ва ахборот технологиялари соҳасида хўжалик юритувчи субъектлар учун шарт-шароитларни, шу жумладан илғор чет эл тажрибаси асосида яхшилаш бўйича таклифлар тайёрлаш;

юридик шахсларни Инновация маркази резидентлари сифатида рўйхатга олиш ва уларни резидент мақомидан маҳрум этиш тўғрисидаги қарорларни қабул қилиш; Инновация маркази резидентларининг ҳуқуқлари ва қўнийи манфаатлари ҳимоя қилинишини таъминлаш.

5. Инновация маркази резидентлари 2028 йил 1 январгача бўлган муддатга:

барча турдаги солиқлар ва давлат мақсадли жамғармаларига мажбурий ажратмаларни, шунингдек янада ижтимоий тўловни тўлашдан;

белгиланган тартибда тасдиқланадиган рўйхатлар бўйича Ўзбекистон Республикасида ишлаб чиқарилмайдиган, ўз эҳтиёжлари учун олиб қилинган ускуналар, бутловчи қисмлар, деталлар, узеллар, технологик ҳужжатлар, дастурий таъминот воситалари учун божхона тўловлари тўлашдан (божхона йиғимларидан ташқари);

ўзи ишлаб чиқарадиган товарлар (ишлар, хизматлар)ни экспорт қилишдан тушадиган валюта тушумининг бир қисmini мажбурий сотишдан озод этилсин.

6. Шундай тартиб ўрнатилсинки, унга мувофиқ Инновация маркази резидентлари:

ўзи ишлаб чиқарган товарлар (ишлар, хизматлар)ни экспорт қилишдан тушган пул маблағлари доирасида ходимларга иш ҳақи ва дивидендларни халқаро тўлов карталарига ўтказиш йўли билан нақд бўлмаган шаклда Ўзбекистон Республикаси ҳудудида ҳисоб-китобларни чет эл валютасида амалга ошириш; экспорт контракти мав-

жуд бўлмаган ҳолда Интернет бутунжаҳон ахборот тармоғидаги онлайн дўконлар орқали ишлар ва хизматлар экспортини чет эл валютасида амалга ошириш ҳуқуқига эга бўлади.

7. Ўзбекистон Республикаси Ахборот технологиялари ва коммуникацияларини ривожлантириш вазирлиги Молия вазирлиги ва Давлат солиқ қўмитаси билан биргаликда:

ҳар йили берилган имтиёзлар ва преференцияларнинг АКТ миллий бозорининг ривожланишига таъсири, ички ва ташқи бозорларда дастурий маҳсулотлар ва АКТ хизматларининг рақобатдошлиги даражасини таҳлил қилсин ва таҳлил натижаларини кейинчалик Мувофиқлаштирувчи кенгашга киритсин;

2017 йил 1 ноябргача бўлган муддатда Ўзбекистон Республикаси Президентининг «Мамлакатимизнинг дастурий таъминот воситалари ишлаб чиқувчиларини рағбатлантиришни янада кучайтириш чора-тадбирлари тўғрисида»ги 2013 йил 20 сентябрдаги ПҚ-2042-сон қарорига мувофиқ яратилган Дастурий таъминот воситалари ишлаб чиқувчилари миллий реестрининг келгусида фаолият юритишининг мақсадга мувофиқлиги тўғрисидаги таклифларни Мувофиқлаштирувчи кенгашга киритсин.

8. Инновация маркази резидентлари билан тузилган меҳнат шартномалари бўйича ходимлар томонидан 2028 йил 1 январгача олинган меҳнатга ҳақ тўлаш тарзидаги даромадлар:

7,5 фоиз миқдордаги қатъий белгиланган ставка бўйича жисмоний шахслардан олинадиган даромад солиғига, Ўзбекистон Республикаси Молия вазирлиги ҳузуридаги бюджетдан ташқари Пенсия жамғармасига 4,5 фоизли ставка бўйича фуқароларнинг сугурта бадалларига тортилиши;

солиқ солиш мақсади-

да белгиланадиган жисмоний шахсларнинг умумий йиллик даромадлари ҳажмига киритилмаслиги белгилаб қўйилсин.

9. Ўзбекистон Республикаси Ахборот технологиялари ва коммуникацияларини ривожлантириш вазирлиги Марказий банк билан биргаликда уч ой муддатда республикада товарлар ва хизматларга ҳақ тўлаш учун халқаро тўлов карталарини қабул қилиш, шунингдек Ўзбекистон Республикаси резидентларининг банк ҳисобрақамларига Интернет бутунжаҳон ахборот тармоғидаги онлайн дўконлар орқали товарлар ва хизматларни сотишдан олинган валюта тушумини ҳисобга олиш тизимини мукамал ишлашига доир зарур чоралар кўрсин.

10. Ўзбекистон Республикаси Ташқи савдо вазирлиги доимий асосда Инновация маркази резидентлари ахборот технологиялари маҳсулотларининг хорижга кириб боришини таъминласин.

11. Ўзбекистон Республикаси Вазирлар Маҳкамаси бир ой муддатда Инновация маркази тўғрисидаги низомни тасдиқласин, унда қуйидаги тартиб назарда тутилсин:

Инновация маркази ва Мувофиқлаштирувчи кенгаш фаолиятини ташкил этиш;

юридик шахсларни резидент мақомини олишнинг аниқ мезонларини белгилашни ҳисобга олган ҳолда Инновация маркази резидентлари сифатида рўйхатга олиш;

Инновация маркази резидентлари учун махсус валюта режимини қўллаш.

12. Ўзбекистон Миллий телерадиокомпанияси, Ўзбекистон Миллий ахборот агентлиги Инновация маркази фаолиятининг оммавий ахборот воситаларида кенг ёритилишини ташкил қилсин.

13. Мазкур Фармоннинг ижросини назорат қилиш Ўзбекистон Республикасининг Бош вазири А.Н.Арипов зиммасига юклансин.

Ўзбекистон Республикаси
Президенти

Ш.МИРЗИЁЕВ

Тошкент шаҳри,
2017 йил 30 июнь

Ўзбекистон Республикаси Президентининг "Республикада ахборот технологиялари соҳасини ривожлантириш учун шарт-шароитларни тубдан яхшилаш чора-тадбирлари тўғрисида"ги Фармонига шарҳ

Халқаро иқтисодий ташкилотлар томонидан ўтказилган ўрганиш натижаларига кўра, ҳозирги пайтда дунёда ахборот-коммуникация технологиялари (АКТ) инновацияларнинг ривожланишида, мамлакатнинг ишлаб чиқариши ва рақобатдошлигини ошириш, иқтисодиётни диверсификация қилиш ва тадбиркорлик фаолиятини қўллаб-қувватлаш ҳамда аҳолининг ҳаёт даражасини оширишда муҳим ўрин тутди. Бугунги кунда АКТнинг ривожланиш ҳолати ва мамлакатнинг иқтисодий барқарорлиги ўртасидаги боғлиқлик илмий исботланган.

Мамлакатимизда сўнгги йилларда АКТни барча ижтимоий-иқтисодий тармоқларга, жумладан давлат бошқаруви ҳамда давлат хизматларини кўрсатиш соҳасида жорий қилиш бўйича босқичма-босқич ислохотлар амалга оширилди. Бу ўз ўрнида мамлакатимизда электрон ҳуқуқ тизимини жорий қилишда сезиларли натижаларга эришиш имконини берди. Жумладан, АКТни кенг қўллаш натижасида халқ билан давлат ўртасида алоқа ўрнатилиши самарали тизими жорий қилинди.

Бироқ аксарият ривожланган давлатларга таққослаганда Ўзбекистонда ахборот технологияларининг бугунги ҳолати, уларни иқтисодиёт соҳасига жорий қилиш, шунингдек экспорт даражаси паст бўлиб қолмоқда, рақобатдош ахборот технологиялари соҳасини шакллантиришда мамлакатимизнинг илмий-тадқиқот салоҳиятидан тўлиқ фойдаланилмаётгани. Бу ўз навбатида давлатимизнинг халқаро рейтингига ўз таъсирини кўрсатмоқда.

АКТнинг жадал ривожланиши янги имкониятларни очиб берар экан, давлат томонидан кенг қўллаб-қувватлашни ҳамда республиканинг халқаро АКТ бозоридagi ўрнини кучайтиришни талаб қилади.

Мамлакатимизда АКТ учун халқаро стандартларга мувофиқ дастурий маҳсулотлар ишлаб чиқаришни ривожлантириш, маҳаллий ишлаб чиқарувчилар томонидан сифатли ва рақобатдош дастурий маҳсулотларни ишлаб чиқаришни кенгайтиришни рағбатлантиришни кучай-

тириш, шунингдек 2017-2021 йилларда Ўзбекистон Республикасини ривожлантиришнинг бешта устувор йўналиши бўйича Ҳаракатлар стратегиясини Халқ билан мулоқот ва инсон манфаатлари йилида амалга оширишга оид Давлат дастурида назарда тутилган бошқа вазифаларни ҳал қилиш, АКТ маҳсулотлари экспортини кенгайтириш, маҳаллий ва хорижий инвестицияларни жалб қилишни рағбатлантириш мақсадида Ўзбекистон Республикаси Президентининг "Республикада ахборот технологиялари соҳасини ривожлантириш учун шарт-шароитларни тубдан яхшилаш чора-тадбирлари тўғрисида"ги Фармони қабул қилинди.

Мазкур Фармон билан мамлакатимизда биринчи мартаба ахборот технологиялари соҳасида ҳужалик юритувчи субъектларни, дастурий маҳсулотларни ишлаб чиқарувчиларни бирлаштирадиган Ахборот технологияларини ишлаб чиқиш ва жорий қилишни қўллаб-қувватлаш бўйича «Mirzo Ulugbek Innovation Center» инновация маркази тузилмоқда.

Инновация маркази мамлакатимиз ҳудуди доирасида экстерриториаллик принципи асосида ташкил қилинди, яъни АКТ соҳасидаги корхоналар республикада жойлашган ҳудудидан қатъи назар, Инновация маркази резидентлари бўлиши мумкин. Ушбу таъминот мамлакатда АКТ маҳсулотларини ишлаб чиқаришни ривожлантириш учун энг қулай шарт-шароитларни яратишга хизмат қилади.

Фармон билан Инновация маркази фаолиятининг асосий йўналишлари этиб қуйидагилар белги-ланди:

хўжалик юритувчи субъектлар ва олий таълим муассасаларининг ахборот технологиялари маҳсулотларини ишлаб чиқариш ҳамда ички ва ташқи бозорларда сотишга қаратилган ўзаро ҳамкорлигини кенгайтириш учун зарур ташкилий-техник ва молиявий-иқтисодий шарт-шароитлар яратиш;

АКТ соҳасида рақобатдош лойиҳаларни ички ва ташқи бозорларда сотиш учун хорижий инвестицияларни жалб этишда Инновация маркази рези-

дентларига кўмаклашиш; олий таълим муассасалари ва касб-хунар коллежларини «ахборот технологиялари» мутахассислиги бўйича битирувчиларини ишга жойлаштиришда, шу жумладан иқтидорли ёшлар томонидан «старт-ап» лойиҳаларини амалга оширишда уларни қўллаб-қувватлаш йўли билан иштирок этиш;

қисқа ва ўрта муддатли ихтисослаштирилган курсларни ташкил этиш, шу жумладан чет эл мутахассисларини тақлиф этиш йўли билан АКТ соҳасидаги кадрлар малакасини ошириш ва уларни қайта тайёрлашни ташкил қилиш;

ёш тадбиркорлар томонидан ахборот технологиялари маҳсулотларини ишлаб чиқиш соҳасидаги истиқболли йўналишлар бўйича инновация лойиҳалари амалга оширилишини қўллаб-қувватлаш.

Мазкур йўналишлардан кўрииб турибдики, Инновация маркази фуқароларимиз учун энг қулай шарт-шароитлар яратиш, энг аввало, ахборот технологиялари соҳасида ҳаётга жорий этиш ва амалга ошириш мумкин бўлган аниқ лойиҳаларга эга бўлган иқтидорли ёшларни қўллаб-қувватлаш мақсадида тузилмоқда.

Инновация марказининг олий бошқарув органи сифатида Мувофиқлаштирувчи кенгаш ташкил этилди ҳамда унинг асосий функциялари сифатида қуйидагилар белгиланди:

Инновация марказини ривожлантиришга кўмаклашиш борасида давлат органлари, илмий, таълим муассасалари ва бошқа ташкилотлар фаолиятини мувофиқлаштириш; республикада ахборот технологиялари соҳасини ривожлантиришда Инновация маркази фаолиятини тизимли мониторинг қилиш ва таҳлил қилиш;

Инновация марказининг фаолиятини такомиллаштириш ва ахборот технологиялари соҳасида ҳужалик юритувчи субъектлар учун шарт-шароитларни илғор хорижий тажрибани инобатга олган ҳолда яхшилаш бўйича тақлифлар тайёрлаш;

юридик шахсларни Инновация маркази резидентлари сифатида рўйхатга олиш ва уларни резидент мақомидан маҳрум этиш

тўғрисидаги қарорларни қабул қилиш;

Инновация маркази резидентларининг ҳуқуқлари ва қонуний манфаатларини ҳимоя қилиш.

Фармонга мувофиқ, Инновация маркази резидентларини давлат томонидан қўллаб-қувватлашда биринчи навбатда қуйидаги имтиёз ва преференциялар кўзда тутилди:

Биринчидан, 2028 йилнинг 1 январигача бўлган муддатга:

барча турдаги солиқлар ва давлат мақсадли жамғармаларига мажбурий ажратмаларни, шунингдек ягона ижтимоий тўловни тўлашдан;

белгиланган тартибда тасдиқланадиган рўйхатлар бўйича Ўзбекистон Республикасида ишлаб чиқарилмайдиган, ўз эҳтиёжлари учун олиб кириладиган ускуналар, бутловчи қисмлар, деталлар, узеллар, технологик ҳужжатлар, дастурий таъминот воситалари учун божхона тўловлари тўлашдан (божхона йиғимларидан ташқари);

ўзи ишлаб чиқарадиган товарлар (ишлар, хизматлар)ни экспорт қилишдан тушадиган валюта тушумининг бир қисmini мажбурий сотишдан озод этиш.

Иккинчидан, Инновация маркази резидентларига ўзи ишлаб чиқарган товарлар (ишлар, хизматлар)ни экспорт қилишдан тушган пул маблағлари доирасида ходимларга иш ҳақи ва дивидендларни халқаро тўлов карталарига ўтказиш йўли билан нақд бўлмаган шаклда Ўзбекистон Республикаси ҳудудида ҳисоб-китоблари ни чет эл валютасида амалга ошириш, шунингдек экспорт контракт мавжуд бўлмаган ҳолда Интернет тармоғидаги онлайн дўконлар орқали ишлар ва хизматлар экспортини чет эл валютасида амалга ошириш ҳуқуқи берилди.

Учинчидан, Инновация маркази резидентларининг ходимлари учун қўшимча имтиёзлар, жумладан 2028 йилнинг 1 январига қадар олинган меҳнатга ҳақ тўлаш кўринишидаги даромадлар 7,5 фоиз миқдордаги қатъий белгиланган ставка бўйича жисмоний шахслардан олинмайдиган даромад солиғига, бюджетдан ташқари Пенсия жамғармасига 4,5 фо-

изли ставка бўйича фуқароларнинг сугурта бадалларига тортилиши кўзда тутилган. Бунда ушбу даромадлар солиқ солиш мақсадида белгиланмайдиган жисмоний шахсларнинг умумий йиллик даромадлари ҳажмига киритилмаслиги белгилаб қўйилди.

Ўзбекистон Республикаси Ахборот технологиялари ва коммуникацияларини ривожлантириш вазирлиги томонидан Молия вазирлиги ва Давлат солиқ қўмитаси билан биргаликда ҳар йили берилган имтиёзлар ва преференцияларнинг АКТ миллий бозорининг ривожланишига таъсири, ички ва ташқи бозорларда дастурий маҳсулотлар ва АКТ хизматларининг рақобатбардошлиги даражаси таҳлил қилиб бориладиган ҳамда таҳлил натижалари кейинчалик Мувофиқлаштирувчи кенгашга тақдим этилади.

Масъул идоралар томонидан республикада товарлар ва хизматларга ҳақ тўлаш учун халқаро тўлов карталарини қабул қилиш, шунингдек Ўзбекистон Республикаси резидентларининг банк ҳисобларига Интернет тармоғидаги онлайн дўконлари орқали товарлар ва хизматларни сотишдан олинган валюта тушумини ҳисобга тушириш тизимининг тўлақонли ишлашига доир зарур чоралар кўрилади.

Ушбу Фармонда белгилаб берилган вазифаларнинг тўлиқ амалга оширилиши учун Вазирлар Маҳкамаси томонидан Инновация маркази фаолиятини ташкил этиш, юридик шахсларни унинг резидентлиги сифатида рўйхатдан ўтказишнинг ташкилий-ҳуқуқий механизмларини назарда тутувчи алоҳида қарор қабул қилинади.

Қабул қилинган мазкур Фармоннинг амалга оширилиши ахборот технологияларининг янада ривожланиши, АКТ соҳасида мутахассисларнинг иштирокини кенгайтириш, илмий-тадқиқот ташкилотларининг ҳамда олий таълим муассасаларининг ишлаб чиқариш билан ҳамкорлигини таъминлаш учун зарур ташкилий-техник ва иқтисодий шарт-шароитларни яратиш, шунингдек мамлакатимизнинг экспорт салоҳиятини ошириш имконини беради.

2017-yil 1-iyul, № 52 (9013)

Ўзбекистон Республикаси Президентининг Қарори

ЎЗБЕКИСТОН RESPUBLIKASI FANLAR AKADEMIYASI ХУЗУРИДА ЎЗБЕКИСТОННИНГ ЭНГ ЯНГИ ТАРИХИ БЎЙИЧА ЖАМОАТЧИЛИК КЕНГАШИ ФАОЛИЯТИНИ ТАШКИЛ ЭТИШ ТЎҒРИСИДА

(Давоми. Боши 1-бетда.)

Белгилансинки, Жамоатчилик кенгаши Ўзбекистоннинг энг янги тарихини тадқиқ этиш ва ўқитиш самарадорлигини, мазкур соҳада илмий, ўқув-методик адабиётлар, маънавий-маърифий ишлар сифатини оширишга кўмаклашиш мақсадида ташкил этилган, жамоатчилик асосида фаолият юритувчи идоралараро илмий-мувофиқлаштириш ва маслаҳат органи хисобланади.

2. Қуйидагилар:

Ўзбекистон Республикаси Фанлар академияси ҳузуридаги Ўзбекистоннинг энг янги тарихи бўйича Жамоатчилик кенгаши таркиби 1-иловага мувофиқ;

Ўзбекистон Республикаси Фанлар академияси ҳузуридаги Ўзбекистоннинг энг янги тарихи бўйича Жамоатчилик кенгаши тўғрисидаги Низом 2-иловага мувофиқ тасдиқлансин.

3. Қуйидагилар Жамоатчилик кенгашининг асосий вазифалари этиб белгилансин:

Ўзбекистоннинг энг янги тарихини замонавий назарий-методологик, фанлараро ёндашувларга, тарихийлик ва холислик тамойилларига асосланган ҳолда тизимли ўрганишни ташкил этиш, Ўзбекистоннинг энг янги тарихи бўйича долзарб муаммоларни ишлаб чиқиш, шунингдек, буюқ тарихий-маданий меросга эга бўлган ва жаҳон цивилизациясининг ривожига улкан ҳисса қўшган ўзбек халқининг тарихий ўтмиши ва бугунги кунига баҳо беришда бир ёқлама ёндашувларга, ақидапарастликка йўл қўймаслик ишларини мувофиқлаштириш;

демократик ҳуқуқий давлат ва фуқаролик жамиятини шакллантиришнинг «ўзбек модели» моҳияти ва мазмунини, жамиятда барқарорликни, миллатлараро тотувлик ва диний бағрикенгликни сақлаш бўйича кенг қўламли ишларни, ҳозирги дунёда Ўзбекистоннинг роли ва ўрнини чуқур ўрганиш ва яққол очиб бериш;

илмий, ўқув, ўқув-методик адабиётларнинг янги авлодини тайёрлаш ва чоп этиш ишларини мувофиқлаштириш, уларда Ўзбекистоннинг энг янги тарихини умумжаҳон ва минтақавий жараёнлар билан, шунингдек, ҳозирги Ўзбекистон ҳудудида шаклланган халқлар ва давлатлар ци-

визациясининг тарихий-маданий мероси билан узвий боғлиқ ҳолда кўриб чиқишни таъминлаш;

Ўзбекистоннинг энг янги тарихи бўйича илмий, ўқув ва ўқув-методик адабиётлар, ўқув дастурлари мониторингини олиб бориш, ушбу соҳада илмий-тадқиқот, ўқув-методик ишларнинг сифатини яхшилаш бўйича таклифларни ишлаб чиқиш ва жорий этиш;

фуқароларда тарихий хотира, миллий ўзликни англаш, юксак маънавият, халқнинг тарихий анъаналари, маданий меросига ҳурмат, мамлакатимиз мустакилликка эришганлигининг буюқ тарихий аҳамиятини англаш каби фазилатларни шакллантиришга йўналтирилган маънавий-маърифий ишлар самарадорлигини, шу жумладан, оммавий ахборот воситалари орқали ошириб боришга кўмаклашиш;

Ўзбекистон тарихи бўйича замонавий чет эл илмий ва ўқув адабиётларини ўрганишга йўналтирилган тизимли чора-тадбирларни амалга ошириш, ҳозирги Ўзбекистоннинг тарихий ўтмиши, социал-иқтисодий ва ижтимоий-сиёсий ривожланиши, мамлакатда олиб борилаётган демократик ислохотлар тўғрисидаги холис ахборотни кенг халқро жамоатчиликка етказиш.

4. Белгилансинки:

а) Ўзбекистон Республикаси Фанлар академияси ҳузуридаги Ўзбекистоннинг энг янги тарихи масалалари бўйича Мувофиқлаштирувчи-методик марказ (кейинги ўринларда – Марказ) Жамоатчилик кенгашининг ишчи органи хисобланади, унга қуйидаги асосий вазифалар юкланади:

Жамоатчилик кенгаши фаолиятини илмий-методик таъминлаш;

Ўзбекистоннинг энг янги тарихини ўрганиш бўйича долзарб масалаларни ишлаб чиқишни ташкиллаштириш, илмий-тадқиқот, ўқув-методик ишларнинг сифатини яхшилаш чора-тадбирлари тизимини тайёрлаш ва амалга ошириш, ўқув, илмий-методик адабиётларни тайёрлаш ва чоп этиш, шунингдек, Жамоатчилик кенгашига юкланган бошқа вазифаларни бажариш;

Ўзбекистон Республикаси Халқ таълими вазирлиги, Олий ва ўрта махсус таълим вазирлиги билан

биргаликда Ўзбекистоннинг энг янги тарихи бўйича ўқув-методик адабиётлар яратиш юзасидан танловлар ўтказишда иштирок этиш;

давлат илмий-техника дастурлари доирасида Ўзбекистоннинг энг янги тарихи тадқиқотлари бўйича илмий-техника лойиҳалари танловларини вазифалари рўйхатига киритиш учун таклифлар ишлаб чиқиш ҳамда уларни кўриб чиқиш учун Ўзбекистон Республикаси Фан ва технологиялар агентлигига киритиш;

Ўзбекистоннинг энг янги тарихини ўрганишнинг назарий-методологик асосларини такомиллаштириш юзасидан тадқиқотлар олиб бориш;

ҳар йили ушбу соҳада тадқиқотлар ва таълим бериш даражасини оширишга, замонавий Ўзбекистон, унинг тарихий ўтмиши тўғрисидаги ишончли ахборотни халқро жамоатчиликка етказишга йўналтирилган Ўзбекистон энг янги тарихининг долзарб масалалари бўйича ўтказиладиган халқро ва республика конференция ва семинарлари рўйхатини белгилаш тартибда ишлаб чиқиш;

б) Марказ Ўзбекистон Республикаси Вазирлар Маҳкамаси билан келишилган ҳолда Ўзбекистон Республикаси Фанлар академияси президенти томонидан тайинланган директор бошқарадиган давлат муассасаси хисобланади;

в) Марказ фаолиятини молиялаштириш Ўзбекистон Республикаси Давлат бюджетига маблағлари, шунингдек, қонун ҳужжатларида тақиқланмаган бошқа манбалар ҳисобидан амалга оширилади;

г) Марказ ўз фаолияти доирасида хорижий мамлакатларнинг илмий-тадқиқот ташкилотлари ва халқро жамғармалар билан ҳамкорлик қилади;

д) Марказ муассислар ҳисобидан молиялаштириладиган “Ўзбекистоннинг энг янги тарихининг долзарб масалалари” журнали нашр этади.

5. Ўзбекистоннинг энг янги тарихи масалалари бўйича Мувофиқлаштирувчи-методик марказнинг тузилмаси, штат жадвали ва ходимлар меҳнатига ҳақ тўлаш разрядлари 3–5-иловаларга мувофиқ тасдиқлансин.

6. Ўзбекистон Республикаси Фанлар академияси бир ой муддатда Ўзбекистон Республикаси Фанлар академияси ҳузуридаги Ўзбекистоннинг энг янги тарихи масалалари бўйича Мувофиқлаштирувчи-методик марказ уставини тасдиқласин.

7. Ўзбекистон Республикаси Ахборот технологиялари ва коммуникациялари ривожлантириш вазирлиги Марказни белгилаш тартибда зарур алоқа турлари ва воситалари, шу жумладан, Ҳукумат алоқаси билан, шунингдек, кенг қўламли умумжаҳон Интернет ахборот тармоғига уланишни таъминласин.

8. Ўзбекистон Республикаси Молия вазирлиги: мазкур қарордан келиб чиққан ҳолда, Ўзбекистон Республикаси Давлат бюджетининг 2017 йил учун тасдиқланган харажатлари рўйхатига тегишли ўзгаришлар киритсин;

Ўзбекистон Республикаси Давлат бюджетига харажатлари параметрларида «Илм-фан» соҳаси бўйича ажратиладиган маблағлар доирасида Марказга, унинг таъминоти билан боғлиқ ва зиммасига юкланган вазифаларни бажариш учун зарур бюджет маблағлари ажратилишини назарда тутсин;

битта алоҳида енгил автомобиль воситаси таъминотига лимит ажратсин.

9. «Ўзархив» агентлиги, Ўзбекистон Республикаси Халқ таълими вазирлиги, Олий ва ўрта махсус таълим вазирлиги, бошқа манфаатдор вазирлик ва идоралар, илмий-тадқиқот муассасалари Марказнинг сўровига мувофиқ, архив, ахборот-таҳлил ва унга юкланган вазифаларни бажариш учун зарур бўлган бошқа материалларни бепул асосда тақдим этсин.

10. Ўзбекистоннинг энг янги тарихи бўйича маълумотларнинг ахборот базасини шакллантириш ва тўлдириб бориш учун Марказ қуйидаги мажбурий жўнатмалар реестрига киритилсин:

Ўзбекистон Республикаси Давлат статистика қўмитасининг статистик маълумотлари;

Ахборот технологиялари ва коммуникацияларини

ривожлантириш вазирлигининг Оммавий коммуникациялар соҳасидаги мониторинг маркази бюллетенлари ва кундалик маълумотлари тўплами.

11. Ўзбекистон Матбуот ва ахборот агентлиги:

«Ўзбекистоннинг энг янги тарихи масалалари» журналини «Ўзбекистоннинг энг янги тарихининг долзарб масалалари» номи билан белгиланган тартибда қайта рўйхатдан ўтказилишини таъминласин;

Марказни босма ва китоб маҳсулотлари (тарихий, ҳуқуқий, ижтимоий-сиёсий, иқтисодий ва маънавий-маърифий нашрлар) назорат нусхаларини (1 нусха) бепул оладиган ташкилотлар рўйхатига киритсин.

12. Ўзбекистон Республикаси Фанлар академияси, Ўзбекистон Республикаси Олий ва ўрта махсус таълим вазирлиги ҳамда Ўзбекистон Республикаси Халқ таълими вазирлиги «Ўзбекистоннинг энг янги тарихининг долзарб масалалари» журнали муассислари этиб белгилансин.

13. Ўзбекистон Республикаси Президентининг 2012 йил 27 январдаги «Ўзбекистон Республикаси Олий ва ўрта махсус таълим вазирлиги ҳузурида Ўзбекистоннинг энг янги тарихи бўйича Жамоатчилик кенгашини ташкил этиш тўғрисида»ги ПҚ-1694-сонли қарори ўз кучини йўқотган деб хисоблансин.

14. Ўзбекистон Республикаси Фанлар академияси Ўзбекистон Республикаси Олий ва ўрта махсус таълим вазирлиги, Адлия вазирлиги ва бошқа манфаатдор вазирлик ва идоралар билан биргаликда қонун ҳужжатларига мазкур қарордан келиб чиқадиган ўзгаришлар ва қўшимчалар тўғрисида Вазирлар Маҳкамасига бир ой муддатда таклифлар киритсин.

15. Мазкур қарорнинг ижросини назорат қилиш Ўзбекистон Республикасининг Бош вазири А.Н.Арипов ва Ўзбекистон Республикаси Президентининг Давлат маслаҳатчиси А.Н.Юнусходжаев зиммасига юклансин.

**Ўзбекистон Республикаси
Президенти**

Ш.МИРЗИЁЕВ

Тошкент шаҳри,
2017 йил 30 июнь

Ўзбекистон Республикаси Президентининг "Ўзбекистон Республикаси Фанлар академияси ҳузурда Ўзбекистоннинг энг янги тарихи бўйича Жамоатчилик кенгаши фаолиятини ташкил этиш тўғрисида"ги қарорига шарҳ

Мустақиллик йилларида мамлакатимизда буюк тарихий-маданий меросга эга бўлган ва жаҳон цивилизациясининг ривожига улкан ҳисса қўшган ўзбек халқининг тарихий ўтмишини ўрганиш юзасидан кенг қамровли ишлар амалга оширилди. Миллий ўзлини англаш, халқлар ўртасидаги тотувлик ва диний бағрикенгликни мустаҳкамлаш, умумий барқарорликни сақлаш ишида тарих сезиларли аҳамият касб этмоқда.

Маълумки, Ўзбекистон Республикаси Президентининг "Фанлар академияси фаолияти, илмий-тадқиқот ишларини ташкил этиш, бошқариш ва молиялаштиришни янада такомиллаштириш чоратадбирлари тўғрисида" 2017 йил 17 февралдаги ПҚ-2789-сонли қарорига асосан бир қатор илмий-тадқиқот муассасалари Фанлар академияси таркибига ўтказилди. Уларнинг қаторида академик институт мақомига қайтадан эга бўлган, тарихий илм-фан ва таълимнинг барча бўғинларининг ривожланишида ётачки сифатида ҳисса қўшадиган — Тарих институти. Амалга оширилаётган тизимли ишларнинг мантаний давоми сифатида Олий ва ўрта махсус таълим вазирлиги ҳузурдаги Ўзбекистоннинг энг янги тарихи бўйича Жамоатчилик кенгаши Фанлар академияси ҳузурдаги Ўзбекистоннинг энг янги тарихи бўйича Жамоатчилик кенгашига айлантирилди, шу билан бирга Олий ва ўрта махсус таълим вазирлиги ҳузурдаги Ўзбекистоннинг энг янги тарихи масалалари бўйича Мувофиқлаштирувчи-методик марказ Фанлар академияси тасарруфига ўтказилди.

Ўзбекистон миллий давлатчилигининг вужудга келиши ва тараққий топишининг энг янги тарихини тадқиқ этиш ва ўқитиш, илмий, илмий-оммабоп, ўқув-методик, маърифий адабиётларни тайёрлаш ва чоп этиш, илм-фаннинг таълим ва бошқа ижтимоий

соҳалар билан интеграцияси механизmlарини мустаҳкамлаш ва ривожлантириш борасида илмий, маданий, таълим, жамоат муассасалари ва ташкилотлари фаолиятини мувофиқлаштириш ишларининг самарадорлигини ошириш, ёшларда, авваломбор умумтаълим мактаблари, касб-хунар коллежлари, академик лицейлар ўқувчиларида, олий ўқув муассасалари талабаларида мамлакат тарихи ҳақидаги чуқур билимларни шакллантириш мақсадида Ўзбекистон Республикаси Президентининг "Ўзбекистон Республикаси Фанлар академияси ҳузурда Ўзбекистоннинг энг янги тарихи бўйича Жамоатчилик кенгаши фаолиятини ташкил этиш тўғрисида"ги қарори қабул қилинди.

Ушбу қарор билан Ўзбекистоннинг энг янги тарихи бўйича Жамоатчилик кенгашининг қуйидаги асосий вазифалари белгиланди:

демократик ҳуқуқий давлат ва фуқаролик жамиятини шакллантиришнинг «Ўзбек модели» моҳияти ва мазмунини, жамиятда барқарорликни, миллатлараро тотувлик ва диний бағрикенгликни сақлаш бўйича кенг қўламли ишларни, ҳозирги дунёда Ўзбекистоннинг роли ва ўрнини чуқур ўрганиш ва яққол очиб бериш;

Ўзбекистоннинг энг янги тарихини замонавий назарий-методологик, фанлараро ёндашувларга, тарихийлик ва холислик тамойилларига асосланган ҳолда тизимли ўрганишни ташкил этиш, Ўзбекистоннинг энг янги тарихи бўйича долзарб муаммоларни ишлаб чиқиш, шунингдек, буюк тарихий-маданий меросга эга бўлган ва жаҳон цивилизациясининг ривожига улкан ҳисса қўшган ўзбек халқининг тарихий ўтмиши ва бугунги кунига баҳо беришда бир ёқлама ёндашувларга, ақидапарастликка йўл қўймаслик ишларини мувофиқлаштириш;

илмий, ўқув, ўқув-методик адабиётларнинг энг янги авлодини тай-

ёрлаш ва чоп этиш ишларини мувофиқлаштириш, уларда Ўзбекистоннинг энг янги тарихини умумжаҳон ва минтақавий жараёнлар билан, шунингдек, ҳозирги Ўзбекистон ҳудудида шаклланган халқлар ва давлатлар цивилизациясининг тарихий-маданий мероси билан узвий боғлиқ ҳолда кўриб чиқишни таъминлаш;

Ўзбекистоннинг энг янги тарихи бўйича илмий, ўқув ва ўқув-методик адабиётлар, ўқув дастурлари мониторингини олиб бориш; соҳада илмий-тадқиқот, ўқув-методик ишларнинг сифатини яхшилаш бўйича тақлифларни ишлаб чиқиш ва жорий этиш;

фуқароларда тарихий хотира, миллий ўзлини англаш, юксак маънавият, халқнинг тарихий аънавалари, маданий меросига хурмат, мамлакатимиз мустақилликка эришганлигининг буюк тарихий аҳамиятини англаш каби фазилатларни шакллантиришга йўналтирилган маънавий-маърифий ишлар самарадорлигини, шу жумладан, оммавий ахборот воситалари орқали ошириб боришга қўмақлашиш;

Ўзбекистон тарихи бўйича замонавий чет эл илмий ва ўқув адабиётларини ўрганишга йўналтирилган тизимли чора-тадбирларни амалга ошириш, ҳозирги Ўзбекистоннинг тарихий ўтмиши, социал-иқтисодий ва ижтимоий-сиёсий ривожланиши, мамлакатда олиб борилаётган демократик ислохотлар тўғрисидаги холис ахборотни кенг халқро жамоатчиликка етказиш;

Қарорда ижтимоий-гуманитар фанларнинг таълим билан интеграциялашувини мустаҳкамлаш ва ривожлантиришга алоҳида эътибор қаратилган.

Жамоатчилик кенгаши шунингдек, "Тарих" таълим йўналиши ва тегишли магистратура мутахассисликлари бўйича малака талабларини ишлаб чиқишда қатнашиши мустаҳкамлаб қўйилди.

Жамоатчилик кенгашининг ишчи органи сифатида Ўзбекистоннинг энг янги тарихи масала-

лари бўйича Мувофиқлаштирувчи-методик марказ белгиланган бўлиб, унинг асосий вазифалари сифатида Жамоатчилик кенгаши фаолиятини илмий-методик таъминлаш, Ўзбекистоннинг энг янги тарихини ўрганиш бўйича долзарб масалаларни ишлаб чиқиш, Ўзбекистон Республикаси Халқ таълими вазирлиги, Олий ва ўрта махсус таълим вазирлиги билан биргалликда Ўзбекистоннинг энг янги тарихи бўйича ўқув, ўқув-методик адабиётлар яратиш юзасидан танловлар ўтказишда иштирок этиш, давлат илмий-техника дастурлари доирасида Ўзбекистоннинг энг янги тарихи тадқиқотлари бўйича илмий-техника лойиҳалари танловларини вазифалари рўйхатида киритиш учун тақлифлар ишлаб чиқиш ҳамда уларни кўриб чиқиш учун Ўзбекистон Республикаси Фан ва технологиялар агентлигига киритиш, Ўзбекистоннинг энг янги тарихини ўрганишнинг назарий-методологик асосларини такомиллаштириш юзасидан тадқиқотлар олиб бориш, ҳар йили Ўзбекистон энг янги тарихининг долзарб масалалари бўйича ўтказиладиган халқро ва республика конференция ва семинарлари рўйхатини белгиланган тартибда ишлаб чиқиш белгиланган.

Ушбу қарор давлатимиз томонидан фан ва таълим ўртасидаги интеграцияни кучайтириш, мамлакатнинг интеллектуал салоҳиятини мустаҳкамлаш, илмий-тадқиқот муассасаларининг моддий-техника базасини яхшилаш ҳамда ёш авлодда тарихий хотира, миллий ўзлини англаш, юксак маънавият, халқимизнинг тарихий аънавалари, маданий меросига хурмат, мамлакатимиз мустақилликка эришганлигининг буюк тарихий аҳамиятини англаш каби фазилатларни шакллантиришга йўналтирилган маънавий-маърифий ишлар самарадорлигини оширишдаги кенг қўламли ишларнинг ҳуқуқий асоси ҳисобланади.

Педагоглар парламент фаолияти билан таништирилди

Ўзбекистон Республикаси Олий Мажлиси Қонунчилик палатасининг Мудофаа ва хавфсизлик масалалари қўмитаси томонидан Тошкент шаҳридаги халқ таълими муассасалари ходимларини мамлакатимизда олиб борилаётган кенг қўламли ислохотлар, парламент фаолияти, суд-ҳуқуқ тизимидаги янгиланган билан таништиришга бағишланган давра суҳбати ташкил этилди.

Мудофаа ва хавфсизлик масалалари қўмитаси раиси ўринбосари А.Раҳмонов

ва бошқалар Президентимиз Шавкат Мирзиёев раҳнамолигида мамлакатимизда давлат ва жамият қурилишини такомиллаштириш



Oliy Majlis Qonunchilik palatasida

га йўналтирилган демократик ислохотларни чуқурлаштириш ва мамлакатимизни модернизация қилишда парламент ҳамда сиёсий партияларнинг ролини кучайтириш, давлат бошқаруви тизимини ислоҳ қилишга алоҳида эътибор

қаратилаётганини таъкидлади.

Ўзбекистон Республикасини янада ривожлантириш бўйича Ҳаракатлар

стратегиясида бу борадаги ишларни тизимли равишда амалга ошириш бўйича аниқ вазифалар белгиланган. Хусусан, давлат ҳокимияти тизимида Олий Мажлисининг ролини ошириш, унинг мамлакат ички ва ташқи сиёсатига

оид муҳим вазифаларни ҳал этиш ҳамда ижро ҳокимияти фаолияти устидан парламент назоратини амалга ошириш бўйича ва-

колатларини кенгайтириш, қабул қилинаётган қонунларнинг амалга оширилаётган ижтимоий-иқтисодий, сиёсий ва суд-ҳуқуқ ислохотлари жараёнига таъсирини кучайтириш ҳолда қонун ижодкорлиги фаолияти сифатини тубдан

ошириш бу борада муҳим аҳамият касб этмоқда. Парламент қуйи палатасининг доимий асосда фаолият юритиши қонунларнинг сифати ошишига хизмат қилмоқда.

Давра суҳбатида ёшларга таълим бериш жараёнини янада такомиллаштириш, уларда ҳуқуқий фанларни чуқур ўрганишга бўлган қизиқини рағбатлантириш масалалари муҳокама этилди.

Н. НАСРИЕВ,
ЎЗА мухбири

2017-yil 1-iyul, № 52 (9013)

Ўзбекистон Республикаси Президентининг Қарори

ИСЛОМ КАРИМОВ НОМИДАГИ ТОШКЕНТ ДАВЛАТ ТЕХНИКА УНИВЕРСИТЕТИ ТЕРМИЗ ФИЛИАЛИ ФАОЛИЯТИНИ ТАШКИЛ ЭТИШ ЧОРА-ТАДБИРЛАРИ ТЎҒРИСИДА

Ўзбекистон Республикаси Президентининг 2017 йил 20 апрелдаги "Олий таълим тизимини янада ривожлантириш чора-тадбирлари тўғрисида"ги ПҚ-2909-сон қарори ижросини таъминлаш ҳамда минтақада ишлаб чиқариш, мавжуд техника ва технологиялардан фойдаланиш, хизмат кўрсатишнинг асосий тармоқларини ривожлантириш, муҳандислик таълимини ривожлантиришда жаҳон таърибасини ҳисобга олган ҳолда кадрлар тайёрлаш тизимини жойларда ташкил этишни янада такомиллаштириш ва сифатини яхшилаш мақсадида:

1. Ўзбекистон Республикаси Президентининг 2017 йил 20 апрелдаги "Олий таълим тизимини янада ривожлантириш чора-тадбирлари тўғрисида"ги ПҚ-2909-сон қарорига мувофиқ Ислом Каримов номидаги Тошкент давлат техника университети Термиз филиали (кейинги ўринларда Тошкент давлат техника университети Термиз филиали деб аталади) ташкил этилганлиги маълумот учун қабул қилинсин.

2. Тошкент давлат техника университети Термиз филиалининг асосий вазифалари этиб қуйидагилар белгилансин:

транспорт тизимлари ва йўллари ҳамда уларнинг эксплуатацияси, кимёвий технология, бино ва иншоотлар қурилиши ва материаллари, озик-овқат технологияси, технология машина ва жиҳозлар, энгил саноат технологияси, экология ва саноат хавфсизлиги соҳаларида юқори малакали мутахассисларни ҳалқара стандартлар даражасида сифатли тайёрлашни таъминлаш;

иқтисодиёт тармоқларини ривожлантиришнинг илмий-технологик вазифаларини ҳал этишга, илғор хорижий технологияларни синаб кўриш ва жорий этишга йўналтирилган илмий-амалий тадқиқотларни олиб бориш ва ишланмаларни амалга ошириш;

хорижий мамлакатлар таълим муассасаларининг таърибасини ва мамлакат иқтисодиёти талаб-эҳтиёжларини ҳисобга олган ҳолда тегишли муҳандислик-техник ва ишлаб чиқариш йўналишлари ҳамда мутахассисликлар бўйича илмий-услубий адабиётларни ишлаб чиқиш;

қўшма илмий лойиҳаларни амалга ошириш, илмий-таълим жараёнига чет эллик мутахассисларни жалб этиш мақсадида техника соҳасидаги етакчи хорижий олий таълим муассасалари ва илмий марказлари билан ҳамкорлик алоқаларини ривожлантириш.

3. Тошкент давлат техника университети Термиз филиалига ҳар йилги талабаларни қабул қилиш сони белгиланган тартибда тасдиқланган республика олий таълим муассасаларига ўқишга қабул қилиш квоталаридан келиб чиққан ҳолда белгилансин.

4. Қуйидагилар:

Ислом Каримов номидаги Тошкент давлат техника университети Термиз филиалининг тузилмаси 1-иловага мувофиқ;

Ислом Каримов номидаги Тошкент давлат техника университети Термиз филиалини ташкил этиш, унинг моддий-техника ва илмий-педагогик базасини таъминлаш чора-тадбирлари дастури 2-иловага мувофиқ тасдиқлансин.

Ўзбекистон Республикаси Олий ва ўрта махсус таълим

вазирлиги, зарур ҳолларда, Тошкент давлат техника университети Термиз филиалининг тузилмасига ходимларнинг тасдиқланган умумий чекланган сони доирасида ўзгартиришлар киритиш ҳуқуқи берилсин.

5. Ўзбекистон Республикаси Олий ва ўрта махсус таълим вазирлиги 2017 йил 1 сентябрда:

Тошкент давлат техника университети Термиз филиалини танлов асосида юқори малакали профессор-ўқитувчилар билан таъминлаш чораларини кўрсин;

Тошкент давлат техника университети Термиз филиалида ўқув-методик жараёнинг ташкил этилишини таъминлаш, штатлар жадвали ва харажатлар сметасини тасдиқлаш, уни ўқув адабиётлари, замонавий ўқув лаборатория жиҳозлари ва компьютер техникаси билан таъминлаш бўйича аниқ чора-тадбирларни амалга оширсин.

6. Сурхондарё вилояти ҳокимлиги ва Ўзбекистон Республикаси Олий ва ўрта махсус таълим вазирлигининг Термиз шаҳри, Султон Саодат кўчаси, 288 "а"-уйда жойлашган Термиз давлат университети қошидаги Термиз академик лицейининг бинолари ва иншоотларини худудлари билан Тошкент давлат техника университети Термиз филиалига оператив бошқариш ҳуқуқи билан бепул фойдаланишга бериш тўғрисидаги таклифи маъқуллансин.

Белгиланган қуйилсинки, Термиз давлат университети қошидаги Термиз академик лицейи Тошкент давлат техника университети Термиз филиалининг биноларида ижара тўловисиз жойлашади.

7. Ўзбекистон Республикаси Иқтисодиёт вазирлиги ва Молия вазирлиги Ўзбекистон Республикаси Олий ва ўрта махсус таълим вазирлигининг асосланган ҳисоб-китоблари бўйича Ўзбекистон Республикаси Инвестиция дастурининг 2019 йилга ва кейинги йилларга параметрларини шакллантиришда Тошкент давлат техника университети Термиз филиали объектларини реконструкция қилиш, капитал таъмирлаш ва жиҳозлаш учун Ўзбекистон Республикаси Молия вазирлиги ҳузуридаги Бюджетдан ташқари таълим ва табиёт муассасаларининг моддий-техника базасини ривожлантириш жамғармаси ҳисобидан маблағлар ажратилишини назарда тутсин.

8. Белгиланган қуйилсинки, Тошкент давлат техника университети Термиз филиалини сақлаш харажатлари 2017 йилда "Маориф" соҳаси бўйича тасдиқланган бюджет параметрлари доирасида, 2018 йилдан бошлаб эса мазкур соҳага ҳар йили ажратилган маблағлар доирасида амалга оширилади.

9. Қуйидагилар Тошкент давлат техника университети Термиз филиалининг фаолиятини молиялаштириш манбалари этиб белгилансин:

Ўзбекистон Республикаси Давлат бюджети маблағлари; ҳўжалик фаолиятидан ва шартнома асосида хизматлар кўрсатишдан тушадиган тушумлар;

жимсоний ва юридик шахс-

ларнинг хомийлик хайриялари ва мақсадли бадаллари; халқаро молия ташкилотларининг грантлари;

қонун ҳужжатларида тақиқланмаган бошқа манбалар.

10. Ўзбекистон Республикаси Молия вазирлиги Тошкент давлат техника университети Термиз филиалига 2 та, шу жумладан, 1 та хизмат ва 1 та махсус энгил автотранспорт воситасини сақлашга лимит ажратсин.

11. Ўзбекистон Республикаси Президентининг 2016 йил 2 майдаги "Тошкент давлат техника университети фаолиятини янада такомиллаштириш чора-тадбирлари тўғрисида"ги ПҚ-2524-сон қарорининг 1-илоvasи матни 3-иловага мувофиқ тахрирда баён этилсин.

12. Ўзбекистон Республикаси Олий ва ўрта махсус таълим вазирлиги манфаатдор вазирлик ва идоралар билан биргаликда бир ой муддатда: қонун ҳужжатларига ушбу қарордан келиб чиқадиган ўзгартириш ва қўшимчалар тўғрисида Ўзбекистон Республикаси Вазирлар Маҳкамасига таклифлар киритсин.

ўзлари қабул қилган норматив-ҳуқуқий ҳужжатларини ушбу қарорга мувофиқлаштирсин.

13. Мазкур қарорнинг ижросини назорат қилиш Ўзбекистон Республикасининг Бош вазир А.Н.Арипов ва Ўзбекистон Республикаси Президентининг Давлат маслаҳатчиси А.Н.Юнусходжаев зиммасига юклансин.

Ўзбекистон Республикаси
Президенти

Ш.МИРЗИЁЕВ

Тошкент шаҳри,
2017 йил 29 июнь

Ўзбекистон Республикаси Президентининг "Ислом Каримов номидаги Тошкент давлат техника университети Термиз филиали фаолиятини ташкил этиш чора-тадбирлари тўғрисида"ги қарорига шарҳ

Республикамизда кадрларни тайёрлаш, уларнинг етуқ мутахассис бўлиб етишишга катта аҳамият берилмоқда. Ўзбекистон Республикаси Президентининг "Ислом Каримов номидаги Тошкент давлат техника университети Термиз филиали фаолиятини ташкил этиш чора-тадбирлари тўғрисида"ги қарори Ўзбекистон Республикаси Президентининг 2017 йил 20 апрелдаги "Олий таълим тизимини янада ривожлантириш чора-тадбирлари тўғрисида"ги ПҚ-2909-сон қароридан белгиланган вазифаларнинг ўз мuddатига тўлиқ ҳажмда ижросини таъминлаш мақсадида, шунингдек, Сурхондарё воҳасида ишлаб чиқариш, мавжуд техника ва технологиялардан фойдаланиш, хизмат кўрсатишнинг асосий тармоқларини ривожлантириш, муҳандислик таълимни ривожини жаҳон таърибасини ҳисобга олган ҳолда кадрлар тайёрлаш тизимини ташкил этишни янада такомиллаштириш ва сифатини яхшилаш, талаб қилинган хизмат кўрсатиш соҳаси йўналишларини ривожлантиришни рағбатлантириш мақсадида қабул қилинди.

Бугунги кунга қадар Сурхондарё вилоятида янгона Термиз давлат университети фаолият олиб борган бўлиб,

ҳар йили абитуриентлардан энг кўп ҳужжат топшириш ушбу олий таълим муассасасига тўри келар эди. Бу йилдан бошлаб Сурхондарё вилоятида Термиз давлат университети билан биргаликда яна иккита олий таълим муассасасининг филиали талабаларни қабул қилади. Улардан бири Тошкент давлат техника университети Термиз филиалидир.

Қабул қилинган қарорга кўра, қуйидагилар Тошкент давлат техника университети Термиз филиалининг энг муҳим вазифалари этиб белгиланган:

транспорт тизимлари ва йўллари ҳамда уларнинг эксплуатацияси, кимёвий технология, бино ва иншоотлар қурилиши ва материаллари, озик-овқат технологияси, технология машина ва жиҳозлар, энгил саноат технологияси, экология ва саноат хавфсизлиги соҳаларида юқори малакали мутахассисларни ҳалқара стандартлар даражасида сифатли тайёрлашни таъминлаш;

иқтисодиёт тармоқларини ривожлантиришнинг илмий-технологик вазифаларини ҳал этишга, илғор хорижий технологияларни синаб кўриш ва жорий этишга йўналтирилган илмий-

амалий тадқиқотларни олиб бориш ва ишланмаларни амалга ошириш;

хорижий мамлакатлар таълим муассасаларининг таърибасини ва мамлакат иқтисодиёти талаб-эҳтиёжларини ҳисобга олган ҳолда тегишли муҳандислик-техник ва ишлаб чиқариш йўналишлари ҳамда мутахассисликлар бўйича илмий-услубий адабиётларни ишлаб чиқиш;

қўшма илмий лойиҳаларни амалга ошириш, илмий-таълим жараёнига чет эллик мутахассисларни жалб этиш мақсадида техника соҳасидаги етакчи хорижий олий таълим муассасалари ва илмий марказлари билан ҳамкорлик алоқаларини ривожлантириш.

Тошкент давлат техника университети Термиз филиалига ҳар йилги талабаларни қабул қилиш йўналишлари ва қабул квотаси воҳанинг олий маълумотли муҳандис-техник кадрларга бўлган эҳтиёждан келиб чиққан ҳолда белгиланади.

Қарор билан Ислом Каримов номидаги Тошкент давлат техника университети Термиз филиалини ташкил этиш, унинг моддий-техника ва илмий-педагогик базасини таъминлаш чора-тадбирлари дастури тасдиқланди. Шунингдек, мазкур Дастурга му-

вофиқ 2017 йил 1 сентябрда Тошкент давлат техника университети Термиз филиалини танлов асосида юқори малакали профессор-ўқитувчилар билан таъминлаш чоралари белгиланди.

Бундан ташқари, Сурхондарё вилояти ҳокимлиги ва Ўзбекистон Республикаси Олий ва ўрта махсус таълим вазирлигининг таклифларига кўра Термиз шаҳри, Султон Саодат кўчаси, 288 "а"-уйда жойлашган Термиз давлат университети қошидаги Термиз академик лицейининг бинолари ва иншоотлари худудлари билан Тошкент давлат техника университети Термиз филиалига фойдаланишга берилди.

Ўзбекистон Республикаси Президентининг "Ислом Каримов номидаги Тошкент давлат техника университети Термиз филиали фаолиятини ташкил этиш чора-тадбирлари тўғрисида"ги қарори улзуксиз таълим тизимини ривожлантириш, мамлакатимиз худудларининг изчил ривожланиб бораётган иқтисодиётини юқори малакали кадрлар билан таъминлаш, барча соҳа ва тармоқларни стратегик жиҳатдан комплекс ривожлантириш масалаларини ҳал қилиш борасида олий таълим тизими широкини кенгайтириш йўлидаги яна бир муҳим амалий қадам бўлиб ҳисобланади.

2017-yil 1-iyul, № 52 (9013)

Темир иродали темирйўлчилар

битирув-малакавий ишларини ҳимоя қилмоқда

Тошкент темир йўл муҳандислари институтида битирув-малакавий ишлари ва магистрик диссертациялари ҳимоялари қизгин ўтмоқда. Олий таълим муассасасидаги ўқинишнинг якуний босқичи ҳисобланган бу жараён катта ҳаёт остонасидаги бўлгуси мутахассиснинг билимларини сарҳисоб қилиш, иқтидор ва қобилиятини намойиш этиш, ишлаб чиқариш корхоналари эътиборига тушиб, ўз йўналиши бўйича ишга жойлаштиришга берилган яна бир имкониятдир. Шу боис таълим муассасаларида ҳимоя жараёнининг белгиланган талаблар доирасида кечиши, битирув-малакавий ишларида кўчирмачилик ва бошқа салбий ҳолатларга йўл қўйилмаганига алоҳида аҳамият қаратилмоқда. Айни кунда талабалар олиб бораётган кичик тадқиқот шунчаки соҳага тааллуқли фанларнинг назарий жиҳатларини ўрганиш ва уни қайта такрорлаш эмас, бевосита амалиёт билан боғлиқ муаммоларнинг ечимига қаратилгани эътиборга молик. Энг муҳими, ҳимояларнинг барчаси темир йўл тизимидаги корхоналарда ўтказилмоқда.

— Институтимизда бакалавриятни 18 йўналиш бўйича 965 нафар, магистратурани 12 мутахассис бўйича 101 нафар талаба тамомламоқда, — дейди институт ўқув-услубий бошқармаси бошлиғи Гулчехра Холбоева. — Битирувчиларнинг битирув-малакавий ишлари ва магистрик диссертациялари ҳимоялари темир йўл тизимидаги “Ўзтемирйўлқурилиш-монтаж” УК, “Сувсоз” ДУК, Сигналлаштириш ва алоқа бошқармаси, Тошкент минтақавий темир йўл узели, Тошкент юк бекати, Йўловчи вагонларни техник ва технологик рейсга тайёрлаш филиали каби ташкилотларда ўтказилмоқда. Талабаларнинг илмий изланишлари ўз таълим йўналишидан келиб чиққан ҳолда темир йўл бошқармасига қарашли йиғма темир-бетон конструкциялар ишлаб чиқариш, автомобиль кранларини таъмирлаш заводи, темирйўлнинг қурилиш-таъмирлаш ишлари учун темир-бетон буюмларини ишлаб чиқариш, темирйўлчилар оиласи учун кўп қаватли турар жой биносини лойиҳалаш, муайян станциядан белгиланган узунликда янги темир йўл қурилишини ташкил этиш, янги темир йўл участкаси қурилишини ташкил этиш ва бурғулаш ишларини бажариш технологияси сингари мавзуларни қамраб олган.

Институтнинг “Электромеханика” факультетини бу йил 264 нафар талаба тамомламоқда. Битирувчилар “Вагонлар ва вагон хўжалиги”, “Локомотивлар ва локомотив хўжалиги”, “Темир йўллар электр таъминоти”, “Электр транспорти ва юқори тезликдаги электр ҳаракат таркиби” кафедраларига бириктирилган.

— Ҳимоялар бир неча кун ичида ўтгани билан битирув-малакавий ишларини тайёрлаш мурак-

каб жараён, — дейди факультет декани, техника фанлари номзоди, доцент Рустам Раҳимов. — Жараён аввалида битирув-малакавий ишларининг мавзулар банки шакллантирилади. Бунинг учун темир йўл тизимидаги бошқармаларга мурожаат билан чиқилади. Улар ўз илмий ечимини кутаётган муаммоларга доир маълумотлар тақдим этишади. Биз мавзуларни оптималлаштириб, мураккаблик даражасига қараб, битирув-малакавий ишлари, магистрик диссертациялари, шунингдек, докторлик диссертациялари учун мосларини ажратамиз. Битирув-малакавий ишлари учун мавзуларни шакллантиришда охириги уч йиллик мавзулар таҳлил қилиниб, такрорларнинг олди олинади. База тайёр бўлгач, мавзулар темир йўл тизимидаги мутасадди раҳбарлар билан келишилган ҳолда тасдиқланади. Талабалар улар орасидан ўзини қизиқтирган мавзунини танлайди. Битирув олди амалиётига талабаларни жалб этишда улар танлаган илмий мавзу инобатга олинади. Агар талаба гилдирак жуфтини такомиллаштириш мавзусини олган бўлса, албатта, у гилдирак жуфти цехига амалиётга боради. Талаба цех ишчилари сони, майдони, технологик жараён, асбобларнинг ўрнатилиши, таъмирлаш жараёни, ускуналарнинг вазифаси билан боғлиқ саволларга жавоб топгандан кейин илмий изланишларни бошлайди. Мақсадли ташкил этилган битирув олди амалиёти битирув-малакавий ишнинг белгиланган талаблар доирасида тайёрланишида муҳим ўрин тутди. Талаба билан илмий раҳбари, шунингдек, меҳнат муҳофазаси ва иқтисодий масалалар бўйича мутахассислар ишлайди. Давлат аттестация комиссияси раиси темир йўл бошқармалари раҳбарлари орасидан

Jarayon

танланади. Ҳимоя жараёнида кўчирмачилик ҳолати учрамаяпти. Темир йўл тизимида ишлаб чиқариш йилдан-йилга янгиланиб, олдинги йиллардан тубдан фарқланмоқда. Шу боис талабалар ўз изланишларида янгиликка интилиб, ихтирочилик қобилиятини намойиш этишга ҳаракат қилмоқда. Бугун бир йиллик меҳнатимиз маҳсулини талабалар томонидан қўлга киритилган илмий ютуқларда кўриб турибмиз.

Ҳимоя жараёнида талабалар тақдим этаётган илмий лойиҳалар ечимини аниқ ва ҳаётийдир. Бунда, албатта, уларга таълим берган, йўл-йўриқ кўрсатган, қизиқишларини қўллаб-қувватлаган профессор-ўқитувчиларнинг, илмий раҳбарларнинг ҳиссаси катта.

— “Бойсун — Қумқўрғон участкасининг ўзгарувчан токли контакт тармоғини лойиҳалаштириш” мавзусида илмий иш олиб бордим, — дейди электр энергетика йўналиши битирувчиси Жаҳонгирмирзо Исмоилов. — Темир йўл транспортининг электрлаштирилиши юк ва йўловчиларни ташиш оқими, электр поезда тезлиги ҳамда вагонлар сони ва поезд массасини оширишга, шунинг ҳисобига ҳаракат хавфсизлигини таъминлашга имкон беради. Шу маънода, Бойсун — Қумқўрғон участкасининг ўзгарувчан токли контакт тармоғини лойиҳалаштириш ниҳоятда истиқболли. Лойиҳани ишлаб чиқиш жараёнида тасодиқий хатоларнинг олдини олиш мақсадида баландлик икки марта ўлчанди. Битирув-малакавий ишим Давлат аттестация комиссияси аъзолари томонидан юқори баҳога лойиқ қўрилди.

Санобар ЖУМАНОВА,
“Ma'rifat” мухбири

Мақтабгача таълим муассасаларида фаолият юритаётган энг ташаббускор, маҳоратли, фидойи тарбиячиларни аниқлаш, илғор иш тажрибасини оммалаштириш, таълим жараёнига таъбиқ этиш мақсадида ўтказиб келинаётган “Йилнинг энг яхши тарбиячиси” кўрик-танлови бу йил ноанъанавий равишда ўтказилди.

Ғолиблар талаба бўлади!

— Танлов низомига бир қатор янгиликлар киритилди. Эндиликда танловда фақатгина ўрта махсус маълумотли мутахассислар иштирок этиши белгиланди. Эътиборлиси, 1-, 2- ва 3-ўринни қўлга киритган ғолиблар Вазирлар Маҳкамасининг 2010 йил 18 июнда тасдиқланган “Олий таълим муассасаларининг бакалавриятга талабаларни қабул қилиш тартиби тўғрисида низом”нинг 18-бандига мувофиқ, Халқ таълими вазирлигининг тақдимномасига асосан олий ўқув юртига тест синовларисиз ва касбий(ижодий) имтиҳонларсиз давлат гранти асосида қабул қилинади, — деди Халқ таълими вазирлиги мақтабгача таълим бўлими бошлиғи Сабоҳат Миржалилова. — Бу еса ўз навбатида тизимда фаолият юритаётган 40 минг нафардан зиёд ўрта махсус маълумотли тарбиячиларни ўзаро рақобатга чорлаш баробарида, уларни ўз

мультимедиа материаллар, болаларни интерфаол усул ва ўйинлар орқали ривожлантириш, ўз ўрнида рағбатлантириш, индивидуал ёндашиш, вақтнинг тўғри тақсимланиши каби мезонлар асосида баҳолаб бордик.

Ана шундай талабларга жавоб берадиган машғулотларни олиб борганлардан бири Ёзёвон туманидаги 12-МТМ тарбиячиси Муҳайё Қаҳҳорова шундай деди:

— Жисмоний тарбия машғулотида болаларни фаоллаштиришга интилганми. Тажрибамдан билангани, болани севманган, унга бор меҳрини берманган тарбиячи мақсадига эришолмайди.

Ниҳоят ҳаяжонли дақиқалар яқинлашди. Машғулотлар якунига кўра ғолиблар эълон қилинди. Унга кўра, Кармана туманидаги 6-МТМ тарбиячиси Нодира Очилова 1-, Тахтакўпир туманидаги 3-МТМ тарбиячиси



Yil tarbiyachisi—2017

устида ишлашга, касбий маҳоратини оширишга, самарали педтехнологияларни жараёнга олиб киришга ундайди. Энг муҳими танлов нуфузини бир неча баробарга оширди.

14 та худуд ғолиблари Мақтабгача таълим ходимларини қайта тайёрлаш ва малакасини ошириш Республика ўқув-методика марказида маҳорат ва топқирликда ўзаро беллашди. Биринчи шартда 50 тадан тест саволларига жавоб бериб, билимларининг баҳосини ўша заҳотиёқ мониторинг кўриш имконига эга бўлишди. 40 дан юқори балл тўплаган иштирокчилар кейинги босқич — касбига доир 5 та саволдан иборат топшириққа ёзма жавоб бериш шартига ўтди. Афсуски, ушбу шарт натижаларига кўра, аттиги етти нафар иштирокчи белгиланган бални тўплади холос.

Улар танловнинг иккинчи куни Олмазор туманидаги 423-МТМда куръа ташлаш йўли билан танланган мавзуларда очик машғулотлар ўтишди.

— Педагогининг касбий салоҳияти машғулот ўтиш жараёнида кўринади, — дейди ҳакамлар ҳайъати аъзоси Гулбаҳор Парпиева. — Тарбиячилар маҳоратини машғулотларнинг “Болажон” таянч дастурига мослиги, босқичларнинг тўғри танлангани, фойдаланилган тарқатма ва

Генжегул Торемурадова 2-, Қарши шаҳридаги 1-МТМ тарбиячиси Мафтунна Бобоева 3-ўринини эгаллади. Шунингдек, 14 нафар иштирокчи ҳам турли номинациялар бўйича тақдирланди.

— 15 йиллик иш тажрибамда мақтабгача таълимнинг бола ривожланишидаги аҳамияти нечоғлиқ муҳим эканлигини англаб етдим, — дейди Кармана туманидаги 6-МТМ тарбиячиси Нодира Очилова. — Юртимизда таълим тизимига, жумладан, мақтабгача таълимга қаратилаётган эътибор биз соҳа ходимларини руҳлантириб, янада яхши ишлашга ундамоқда. Келажакда олий маълумотли мутахассис бўлиб, билдирилган ишонччи оқлашга ҳаракат қиламан. Тизимнинг методик, ҳуқуқий жиҳатдан янада такомиллашишига ўз ҳиссамни қўшишга ваъда берман.

Танлов тақдим этган олий таълим муассасасида талаба бўлиш бахти ғолиб иштирокчиларнинг меҳнатига муносиб рағбат бўлди. Эндиликда улар ҳамкасбларига ўрناк бўлиб, мақтабгача таълим ривожига ҳисса қўладиган илғор мутахассислар қаторидан жой олиши шубҳасиз.

Насиба ЭРХОНОВА,
“Ma'rifat” мухбири
Б.РИЗОКУЛОВ
олган сураб

2017-yil 1-iyul, № 52 (9013)

Йилнинг энг ёш ихтирочиси аниқланди

“Баркамол авлод” республика болалар техник ижодиёт маркази томонидан ташкил этилган “Йилнинг энг ёш ихтирочиси” республика кўрик-танловининг якуний босқичи бўлиб ўтди.

Танловда ўқувчилар техник ижодкорлик йўналишидаги автомобиль, ракетамодел, робототехника ва электрон ўйинчоқлар тўғрисидаги олган билимларининг натижалари сифатида ўзларининг ижодий ишлари — макет ва моделлари билан иштирок этди.

Тошкент давлат техника университети, Тошкент шаҳридаги Турин политехника университети, Тошкент ахборот технологиялари университети мутахассисларидан иборат ҳакамлар ҳайъати аъзолари ҳар бир иштирокчи яратган моделнинг бугунги кундаги аҳамияти, дизайни, техник талабларга



В.ГРАНКИН олган сурат.

жавоб беришига алоҳида эътибор қаратишди.

— Бугунги танловда ўзим яратган овоз тўлқинлари орқали ишлайдиган ўйинчоқ билан қатнашдим, — дейди Ғуздор тумани “Баркамол авлод” болалар маркази аъзоси Дилнигор Очилова. — Ҳайъат аъзоларига мен яратган ўйинчоқ маъқул келди. Болалигимдан техника воси-

талари, соҳадаги янгиликларга қизиқишим кучли бўлгани учун шу йўналишдаги тўғрақ аъзосиман. Бугунги муваффақиятимдан илҳомланиб, келажақда янги-янги ихтироларга қўл уришни ўйлапман.

Танлов сўнггида ғолиб ва иштирокчилар диплом ҳамда эсдалик совғалари билан тақдирланди.

Асолат АХМАДҚУЛОВА

Ёз фаслининг жазирама кунлари ҳам ўтиб бормоқда. Айни шу кезларда ёзги соғломлаштириш оромгоҳларида болаларнинг дам олиши қизгин паллага кирган. Бу мавсумда ёнғин хавфсизлиги қоидаларига риоя қилиш турли кўнгилсиз ҳодисаларнинг олдини олиб, жажжи ўғил-қизларнинг мириқиб ҳордиқ чиқаришини таъминлайди.

Ёз — ўтсин соз!

Оромгоҳларда ёнғин хавфсизлиги чораларини кўриш муҳим аҳамият касб этади. Шу боис ҳар бир оромгоҳ фаолияти ёнғин хавфсизлиги хизмати ходимлари томонидан ўрганиб чиқилиб, хавфсизлик қоидаларига риоя этилиши юзасидан тегишли кўрсатмалар берилади.

Давлат ёнғин хавфсизлиги хизмати томонидан ҳар йили болаларнинг ёзги дам олиши мазмунли ўтиши, кўнгилсиз ҳодисалар юз бермаслиги учун режа ишлаб чиқилади. Режага мувофиқ, дам олиш масканларида ёнғин хавфсизлиги бурчаги ташкил этилади.

Оромгоҳлар раҳбарияти билан ҳамкорликда жорий мавсумда ҳам ёнғин хавфсизлиги қоидаларига риоя қилишга қаратилган турли учрашувлар ташкил этилиб, тарбиячилар ва дам олувчилар ўртасида тушунтириш ишлари олиб борилмоқда. Бу каби амалий тадбирлар ёнғин хавфи юзага келишининг олдини олишга, ёнғин соз ўтишига хизмат қилади.

Умиджон БОТИРОВ,
12-ҲЁХО смена бошлиғи, лейтенант,
Муслим ЎРИНБЕКОВ,
Сергели тумани ЁХБ инспектори,
кичик сержант

Ёзги соғломлаштириш майдончаларида

Мўъжазгина саҳна пардаси кўтарилиб, махсус декорациялар ортидан ранг-баранг либосдаги кўғирчоқлар кўринади. Эртакчи болакай халқ оғзаки ижодига мансуб эртагини бошлаган кез жажжи томошабин-болажонлар киприк қоқмай, диққат билан кўғирчоқлар ҳаракатини кузатади, хаёлан қизиқарли эртак сюжетига «шўнғийди».



Б.РИЗОКУЛОВ олган сурат.

Чилонзор туманидаги 114-умумтаълим мактаби қошидаги «Ғунча» болалар спорт-соғломлаштириш майдончасига қамраб олинган 150 нафар ўғил-қизга жорий мавсум ана шундай ажойиб лаҳзалар туҳфа этилмоқда. Бу масканда тажрибали педагоглар раҳбарлигида мунтазам равишда олиб борилаётган «Драма», «Мохир кўллар», «Инглиз тили», «Ёш рассом», «Ёш эколог»,

«Стол тенниси», «Шахмат», «Шашка» сингари ўндан ортиқ тўғрақ машғулотлари болажонларнинг ҳар бир кунини мазмунан бойитмоқда. Майдонча қошидаги сув ҳавзасида ўқувчилар сузиш бўйича мураббий Жамол Салимжонов бошчилигида режа асосида бирин-кетин сувга шўнғиб, чинакам таътил завқидан баҳра олмақда.

Шунингдек, «Баркамол авлод» республика болалар

бадий ижодиёт маркази ҳамда Фафур Ғулом номидаги маданият ва истироҳат боғи билан ҳамкорликда ташкил этилаётган бир-биридан қизиқарли маданий-маърифий тадбирлар, спорт мусобақалари болажонлар қалбида ўчмас из қолдириши шубҳасиз.

Мақтуба МАЪРУФХОНОВА,
«Ғунча» болалар спорт-соғломлаштириш майдончаси раҳбари

Чемпион билан учрашув

— Камондан ўқ отиш бўйича 6 карра мамлакат чемпиони макомига эришишингизда яна кимларнинг ҳиссаси бор?

— Нуфузли халқаро турнирларда ғалабангиз шарафига Ватанимиз байроғи юксакка кўтарилганида, қалбингизда қандай ҳислар ўтади?

— Осиё ўйинлари совриндори сифатида юртимизда ва хорижда болалар спортига қаратилаётган эътибор қандай?

Яккасарой туманидаги 144-умумтаълим мактаби қошидаги «Нихол» спорт-соғломлаштириш майдончасида ўтказилган «Мен чемпион бўламан!» мавзусидаги тадбирда савол бермаган бола, боринги, тарбиячилар ҳам қолмади, ҳисоб. Республика болалар кутубхонаси ташаббуси билан камондан ўқ отиш бўйича Ўзбекистон терма жамоаси аъзоси, спорт устаси, Ўзбекистон давлат жисмоний тарбия институти талабаси Шаҳзод Абдулҳаев иштирокида ўтган учрашув ана шундай самимий мулоқот, қизгин савол-жавобларга бой бўлди.

Ўз навбатида, викторина саволлари орқали спортсевар болажонларнинг соҳага доир билимлари синовдан ўтказилди. Билимдон ва ҳозиржавоб ўқувчиларга китоблар жамланмаси ва эсдалик совғалари берилди.

— Мазкур мактабнинг аксарият ўқувчилари спорт тўғрисидаги жабл этилганини кўриб қувондик, — деди Республика болалар кутубхонаси етакчи мутахассиси Марҳаб Одилова. — Бу ўғил-қизларнинг саломатлиги мустаҳкамланиши билан бирга, кайфиятини ҳам чоғ қилади. Руҳи тетик болалар эса китоб ўқишни, билимларини бойитишни яхши одатга айлантиради. Кўрярсизми, бир яхшилик ортидан иккинчиси эргашади. Демак, бу каби маданий-маърифий, спорт тадбирлари қанча кўп ўтказилса, шунча соз.

Тадбир сўнггида умидли ёш спортчилар кўргазмали чиқишларини намойиш этди.


Гулжаҳон ҒАНИЕВА,
ЎЗМУ талабаси

Тошкент шаҳар, Олмазор тумани, Зиё (олдинги Саидов) кўчаси, 3-уйда жойлашган “KASBINO” МЧЖга тегишли бўлган ер участкаси учун 2011 йил 13 октябрда “Тошкент шаҳар ер тузиш ва кўчмас мулк кадастри хизмати” томонидан берилган О’У’ 443196 рақамли ва бино иншооти учун 2011 йил 13 октябрда “Тошкент шаҳар ер тузиш ва кўчмас мулк кадастри хизмати” томонидан берилган ТА 1266612 рақамли “Бино ва иншоотларга бўлган ҳуқуқнинг давлат рўйхатидан ўтказилганлиги тўғрисида”ги гувоҳномалар йўқолганлиги боис

БЕКОР ҚИЛИНАДИ.

Тошкент вилояти ўрта махсус, касб-ҳунар таълими бошқармаси дипломга масъул ходими томонидан 2016-2017 ўқув йили биттирувчиларига тарқатиш учун олиб келиниб, тарқатилмаган ва тўлдирилмаган “Имтиёзли” К №-0275347 ва 0275348 ва “Оддий” К №-4858552, 4858553, 4858564, 4858565 рақамдаги “Касб-ҳунар коллежини битирганлик тўғрисида”ги диплом бланкалари олиб келиш вақтида йўқолганлиги сабабли

БЕКОР ҚИЛИНАДИ.



“Куёшли”даги тўрт соатлик машғулот бутун умрга татийғи

Кеча Абдулазиз ойисидан бекитиб музқаймоқ егани учун эрталаб томоғи оғриб уйғонди. Бугун оромгоҳга бориши керак. Шоша-лиша ювинди, нонушта қилди. “Оромгоҳга бормай қўя қол, томоғинг тузалса, эртага чиқарсан!”, деганида болакайнинг кўз ўнгидан оромгоҳ машғулотлари ўта бошлади. Бир-биридан антиқа, баҳамунозарага бой кўнгилочар тадбирлардан воз кечиш мумкинми? Қолаверса, у ерда болалар шифокори ҳам бор. Абдулазиз дастлаб оромгоҳ педиатри Дилрабо Эрхоновага учрашди. Шифокор болакайнинг томоғини текширгач, яллиғлангани ва хиёл қизаргани учун бир-икки кун муздай сув ичмасликни тайинлади. Ердამчи ҳамшира Мадина Камоловага уни алоҳида назоратга олиш зарурлигини уқтириб, кўпроқ суяқлик ичиришни буюрди.

Дарҳақиқат, Олмазор туманидаги 242-умумтаълим мактаби қошида ташкил этилган “Куёшли” кундузги соғломлаштириш оромгоҳига ҳар бир бола эрталаб худди Абдулазизга ўхшаб талпинди. Муассасада яратилган шароит жуда бошқачаман, дёрсиз? Йўқ, ҳаммаси оддий, йўлак ва хоналар ранг-баранг безатилган. Ҳар бир ходим ўз ўрнида, ўсмирни худди ўз ота-онасидек кучоқ очиб, қарши олади. Унда ўқувчини бу ерга оҳанрабодек тортаётган жозиба ва сеҳр нимада?

Ҳаммаси бола қалбига йўл топишда, ҳа, худди шундай. Хўжакўрсинга эмас, ҳар бир машғулотга чин дилдан ёндашиш. Ҳар бир тўғарак учун алоҳида хона, мазмунга мос безак ва жиҳоз. Оромгоҳ раҳбари Шўҳрат Тўлаганов ва бош тарбиячи Оксана Волкова тарбияланувчиларни 5 та гуруҳга бўлиб, ҳар бирига тарбиячи бириктирган. Масалан, “Дельфин” гуруҳи раҳбари Зухра Терно “Моҳир кўллар” тўғарагини бошқарса, “Дўстлик” гуруҳи етакчиси Неиля Гумирова спорт ишқибозларини чоғроққина залда шуғуллантиради. Ҳар бир гуруҳ шу тарзда навбати билан машғулотларга жалб қилинади.

— Оромгоҳимизда қўлла-нилаётган тажриба туман

микёсида оммалаштиришга тавсия этилди, — дейди 242-мактаб директори Лариса Хушбакова. — Тумандаги 7 та мактабда ташкил этилган



Yoz — o'tmoqda soz

кундузги оромгоҳ раҳбари ва тарбиячилари бу ерга келишиди. Эшитган бошқа, кўрган бошқа. Дам олиш масканимизни ўз кўзи билан кўрган ҳамкасбларимиз тўғарак машғулотларини ўтиш тартиби, гуруҳлар билан ишлаш тажрибасини ўргандилар. Нафақат ўз ўқувчиларимиз, балки кўшни 110-, 234-мактабдан ҳам ўсмирлар келишмоқда. Биз уларни бажонидил кутиб оламиз. Боланинг мазмунли ҳордиқ чиқариши учун “Галаба”, “Тепузгар”, “Табассум”, “Нихол”, “Бешкўрган” маҳалла фуқаролар йиғини фаоллари ўз маслаҳат ва кўрсатмаларини беришмоқда. Ҳамжihatлик бўлган жойда самара бор, натижа бор.

12 июндан 4 августгача фаолият юритадиган бу оромгоҳ ўқувчиларни тўрт босқичда соғломлаштириши режалаштирилган. Дастлабки босқичда 130 нафар бола дам олмоқда. Тарбияланувчилар соат 9:00дан 13:00гача турли тўғарак ва спорт машғулотлари билан шуғулланиб, сўнг уйига қайтади.

Бор-йўғи тўрт соатлик тарбиявий жараёнда бола жисмонан қанчалик даражада чинкииб, маънавий олами нақадар бойганини сезиш қийин эмас. Ёзги соғломлаштиришдаги яна бир жараён — сув муолажаси тумандаги 2-болалар ва ўсмирлар спорт мактабига амалга оширилмоқда. Тарбияланувчиларга тўғарак машғулотларидан сўнг табиат кўйинда бўлиш, пойтахтнинг диққатга сазовор масканларига саёҳат уюштириш хуш келяпти.

“Инглиз тили” тўғараги раҳбари Дилдора Аскарқованинг машғулотлари мактабда ўтиладиган дарсдан кескин фарқ қилади. Турли ўйинлар билан боланинг тил ўрганиш имкониятлари кенгайтирилмоқда.

— Дилдора она бугун бизни “Let's play”, яъни “Келинг ўйнаймиз” деб номлаган ўйинга таклиф қилди. Мультимедиа воситасида ҳайвонлар овозини эшитиб, унинг инглизча номи айтдик, — дейди ўқувчи қиз Диёра Одилова.

— Қизимни ўтган йили Бўстонлик туманидаги “Семурғ” оромгоҳига жўнатгандим, — дейди Нилуфар Тўрабекова. — Бу йил у ёнгинамда, хавотирланмайман. Гарчанд Самира куннинг фақат биринчи ярмида банд бўлса ҳам, бунинг ижобий таъсири ва нафи кечга қадар, ҳаттоки, бир умрга татийди. Кундузги оромгоҳ машғулотларининг бепуллиги ота-она учун яна бир афзалликдир.

Оромгоҳда ҳар бир гуруҳнинг тўғарак ва спорт машғулотларидаги иштироки мунтазам баҳолаб борилади. Тўплаган балл мавсум сўнгидан йиғилиб, энг фаол гуруҳлар рағбатлантирилади.

Ҳасан МҮМИНОВ,
“Ma'rifat” муҳбири
Бурҳон РИЗОКУЛОВ
олган суратлар.

Ma'rifat

ТА'СИС
ETUVCHILAR:

О'zbekiston Xalq ta'limi vazirligi,
О'zbekiston Oliy va o'rtta maxsus
ta'lim vazirligi, О'zbekiston
Ta'lim, fan va madaniyat
xodimlari kasaba uyushmasi
Respublika kengashi.

Bosh muharrir **Abdusamat RAHIMOV**

Gazeta O'zbekiston Matbuot va axborot agentligida
2006-yil 22-dekabrda 0067-raqam bilan ro'yxatga
olingan. Indeks: 149, 150. F-715. Tiraj 34076.
Hajmi 4 bosma taboq. Ofset usulida bosilgan,
qog'oz bichimi A-3. Bahosi sotuvda erkin narxda.

TELEFONLAR:

qabulxona — 233-50-55;
kotibiyat — 233-99-15;
reklama va marketing bo'limi —
233-42-92 (faks), 236-54-17.

ISSN 2010-6436



«Ma'rifat»dan
materiallarni ko'chirib
bosish tahririyat
ruxsati bilan amalga
oshirish sharti.

Tahririyatga kelgan
qo'lyozmalar taqриз
qilinmaydi va muallifga
qaytarilmaydi.

«Sharq» nashriyot-matbaa aksiyadorlik kompaniyasi bosmaxonasi.
Korxonaning manzili: Buyuk Turon ko'chasi, 41-uy.

O'za yakuni — 00.55 Topshirildi — 01.40

MANZILIMIZ:

100083, Toshkent shahri,
Matbuotchilar ko'chasi, 32-uy.
Web-site: www.marifat.uz

Dizaynerlar:

Malohat TOSHOVA, Faxriddin RAHIMOV.
Navbatchi muharrir:
Abror UMARQULOV.
Navbatchi:
Bobomurod XUDOYBERDIYEV.

123 56